



ЕГОР РОЧЕВ  
МИТРУК ПЕТО ТУНДРАЫСЬ



**ЕГОР РОЧЕВ**



# **МИТРУК ПЕТО ТУНДРАЫСЬ**



**Сыктывкар**

**Коми книжной издательство**

**1987**

84 Ко—4

Р 80

**Егор Рочев.**

**Р 80** Митрук петö тундраысь: Висьт. — Сыктывкар: Коми книж-  
ной издательство. 1987.—68 л. б.

Тайö книгаас Егор Рочев гижö кöр видзсыяс ймалыс. Кыдзи ичöтик детинка Митрук  
адазö да гöгöрвоё ас гöгöр оломсö. Надейтчам, мый тайö книгаыс воас сьбöдм вылас  
посни войтырлы, öд сийöс сийма стöч налы.

84 Ко — 4

Р 4803010000—002 45—87 м  
М 128(03)—87

© Коми книжной издательство, 1987



**Медводдза юкөн**

## **ТУНДРА — МИТРУКЛӨН ГОРТ**

**МИТРУКЛЫ ГАЖТӨМ**



**М**итрук тшөкыда кольлө өткөн, дерт, оз тундра шөрө — чумө, но сылы и сэни гажтөм. Детинкалөн эм уна чой да вок, но ставныс найө сиктынөсь, ветлөны школаө. Тани эськөн и олө ыджыдджык чойыс, Маринаыс, но сийө детинкалы абу пөв, мамы отсась, пусьө да пөжась.

Митрук бовъялыштіс дадыяс гөгөр, весиг мамыс дады вылө нюждчыліс, дыр видзөдіс енэжө. Сэн нинөм эз тыдав:

ни шонді, ни төлысь, ни кодзув. Митрук төдө нин — лунын ни кодзув, ни төлысь абуёсь, шойччоны гортаныс, сөмын вой кежлө петавлөны дежуритны батыскөд өттшөтш көр стада динө. Но мыйла абу шондыс? Мукөд луннас тай оз и куньлы синсө, дзоргө да дзоргө, сэтшөма югъялө. Митруклөн ни өти чача на сэтшөмыс эз вөвлы. Вөлі кө шондыс матын, Митрук эськө век шыльөдіс-малаліс сылысь зарни мышсө. Көні өні сійө? Висьмис? Нуисны больничаө вертолётөн? Коркө тай нулісны жө сылысь мамсө, висьмис да.

Детинка матыстчис дадь вылын куньгыртись кыньпи-лань — сійөс неважөн кутісны, быдтыны көсіёны. Сөмын, кажитчө, кыньпи узьө, а сідзисө быд сөн сылөн вөрө и немтор оз коль казавтөг. Пыр и чошнитчис Митрук вылө, синкым ув-тись скөра видзөдө. Детинкалы важөн нин окота төдмасьны кыньпикөд, но полыштө, эз на вун коркөя өбидаяс — варснит-ліс дөбельки чуньсө. Кыньписө көть и домөма чеп йылө, а сійө, он и казавлы, кызди судзөдчылас.

— Но, эн пов, эн скөрав, ме тай ог нин, — шуалө Митрук. — Ме тэныд уль яй тор вая.

Збыльысь, регыд детинка вайис яй тор да нюжөдіс кынь-пилы. Сійө дыр эз босьт, а сэсся лёкысь нетшыштис, Митрук быдсөн дрөгнитис.

— Но-о. Эн скөрав, бурасям, ме тай ог нин лёкав. — Митрук малыштис кыньпилысь кымөссө. Мөдыс звирк чеччыштис, самасис ёсь пиньяснас кепысьө. Митрук эз нетшышт кисө, медым раммө, кыз кепысь пырыс оз мөрччыны пиньясыс. Сэсся смелмөдчис да лэптис кыньпиөс сой вылас. Кызди тай варснитас сійө детинкалысь парьяссө, быттё емөн воча вурьштисны! Митрук шы оз вермы лэдзны и синъяссө повзьөмысла кунис. Сэсся лэдзис жө кыньпиыд. Митрук кыкнан кинас топөдіс парьяссө, ымзигтыр жөдзыштис места вылас, сэсся пырис чумө. Марина чойыс мыйөнкө мавтис ранасө.

Сэсся детинка эз нин некор сибөдчыв кыньпи дорө. «Оз ков меным татшөм лёк ёртыд!» — мөвпаліс зонка.



аь козьналіс Митруклы көрпийос. Сьодіник ёк-  
мыль пон моз вөлі йожгыльтчөма дадь бөжө,  
тіраліс көдзыдысла, синьясыс сөніка ва кодьось.  
Митрук малаліс чөла куйылысь көрпийос, но эз  
төд, кызди бурөдны.

— Тшыг сийө,— висьталіс батысь.— Мамыс воштөма  
турөб дырйи, лым пиысь сюри.

Митрук котөрөн пыраліс чумө, петкөдіс тасьті шыд. Но  
көрпи эз и исыштлы сөянсө, көть кызди Митрук эз матөдлы  
сийос:

— Чөскыд зэв тайө, ставөн ми чумын шыд сөям, сы  
вөсна и ог висьөй. И тэ бурдан.

Митруклы жаль көрпийос. Детинка эз нин өтчыд казьявлы,  
кутшөм чожа котралөны стадаын көръяс, сідзи эськөн и сылы,  
Митруклы, дурыштны көрпикөд.

— Оз сөй!— уськөдчис Митрук бать дінас.

— Оз на куж сийө. Велөдам,— ышөдіс батысь.

Восьтіс пурт тышкөн көрпийысь вомсө. Митрук ичөтикаөн  
кисьтышталіс сэтчө шыд, көрпи тяпөдчис кывнас. Лун-мөд  
мысти ачыс велаліс сөйны тасьтіысь.

Вежон мысти көрпи вөтлысис нин дадь бөрся.

Сэссия коркө и лым сыліс, турун петіс, уна лои сөяныс  
көрпийлы, өдйө заводитіс сөвмыны. Авкоөн нимтісны. Тадзи  
көр видзысьяс ыдждөдлөны быд көрөс, коді мамтөг быдмө  
морт дінын.

Митрук радейтө Авкоос. Петас водз асылын чумысь,  
чукөстас:

— Авө-ав!

Көрпи уськөдчө көзяин дөрө. Но Митрук оз жө прөста  
кор, дась няньторйөн чөсмөдны. Медся любө Митруклы Авко-  
лөн вильшасьөм-люкасьөмыс. Небыдик гөна сюрнас сийө быт-  
тө гильөдчө. Но аръявылыс чорзис сюрис, ёсь лыө пөрис. Öні

Митрук мѳд ногджык ворсѳ, каяс дадь вылѳ и манитѳ ас дорас кѳрѳс:

— Лок, эн пов, ог немтор кер, лок.


Авко видзчысьѳмѳн сибѳдчѳ дадь дорѳ, детинка чеччыштѳ сылы мыш вылас, верзьѳмасьѳ, но кѳрпи нѳровтчыштѳ, и Митрук гывдѳ люллялысь керч вылѳ. Бур на, муыс небыд, перина кодь... Митрук чайтис велѳдны Авкоѳс верзьѳмѳн ветлыны, кыдзи вѳлѳс. Сийѳ аддзылис нин кинояс вылысь и сиктысь, кутшѳм ѳдийѳ котралѳны вѳвъясыс. Митрук мѳвпалис, мый велѳдас Авкоѳс да пановтас кѳр видзсысясѳс, гашкѳ, и батьсѳ на бѳрвыв коляс праздникяс дырйи. А мый, ѳна тай жѳ ышнясьѳны збой дадювъяснаныс, оз и казьявны сѳки Митрук-ѳс, сѳмын и ѳлѳдѳны: «Эн кок улѳ пыр!»

Митрук дѳзмытѳдз ноксис Авкокод, нюжѳдчис дадь вылѳ мудзѳмысла. Некымын лун нин вийсьѳ кѳрпикѳд, а тѳлкыс чепѳль мында эз на шед. Авко сулалис ѳни дадь бокрын да веськыда дзоргис детинка вылѳ, быттьѳ дивитис сийѳс: «А ме со эг и мудз!»

— Часлы, ме тѳныд петкѳдла пуж, — Авколы шуѳ Митрук. Корсис гезтор да кѳрталис Авколы сьылиас, ѳтар гез помсѳ топыда гартис веськыд киас, кыдзи батьыс вѳжжисѳ.

— Чо-чо-о, — ыршасьѳ Митрук Авко вылѳ. Кѳрпи первойсѳ видзчысьѳмѳн, а сѳссия век збойджыка кутис турыштчыны водзвыв.

Митрук любѳсѳ оз дзед, вашьялѳ, кытшовтис неумынысь чум гѳгѳр да и веськѳдчис мыльк дорышѳд. Дивъя, сѳмын лѳптав кокъястѳ, а кѳрпи ачыс тирѳдас-лѳбѳдас. Митрук быттьѳ бордьясис: пельясас тѳв шутьялѳ, пидзѳсьясас бадь йывьяс швичийѳдлѳны. Митруклы и кок улас некор видзѳдлыны, тѳвзьѳ и тѳвзьѳ. Уна мыльк вомѳналис, весиг раскѳ эз йѳрмы. Но ѳтилаын детинкаѳс быттьѳ кодкѳ кыскыштис кок пѳлѳдыс, шедис, тюрис водзвыв, парсалис сойсѳ и чужѳмсѳ. Ёнтѳ эськѳ, и забеднѳ, но кутчысьѳ, кѳр видзсысяс абу лябѳсь. Митрук кыпѳдчис, пыркнитис вывсьыс му ѳгсѳ, кѳсийс котѳртны водзѳ, но видзѳдлис бѳрвылас и... ыркнитис сьѳлѳмыс.



Бать козьналіс Митруклы көрпийс

— Көні чумйыс?! Кытчө нуөдін?— кыскыштіс көвійөд Авкоос, сэсся шыбитіс гез помсө: мый пө тэысь? Митрук вуззысис мыльк вылө. И сэтысянь немтор эз тыдав, быттьө абу и вөвлөма чумныс. Бөрддзис. Авко нюлыштіс бан боксө Митруклысь, вешійыштіс водзланьө да бергөдіс юрсө детинка-лань, быттьө корис: лок пө ме бөрся. Авко муныштас да бара сувтлө, виччысьыштө. Кыпөдчисны джуджыдинө.

— Со чумным!— горөдіс Митрук да чепөсийс Авко бөрся, чеччаліс вутшкысь вутшкө. Сэсся туйсө паныдаліс паськыд-кодь ва гуран. Но Митрук эз сувт, эз кытшовт, ёнджыка өддзөдчис да чеччыштіс. Гөп мөдарас вөлөма сук няйт — и пондіс кыскыны ас пытшкас зонкаос. Коді мездас? Коді кылас сылысь горзөмсө? Чум ылын на. А Авко? Но сійө өмөй сям-мас? Век жө Митрук чукөстіс көрпийс. Авко матыстчис, исасьыштіс, чорыджык кок ув бөрийс, сэсся нюжөдіс сюръяссө — на пө. Митрук кутчысис, Авко мыджсис водз кокъяс-нас да кыскис детинкаос.

Митрук сывъяліс көрпийс голяөдыс, и кык друг бөр мөдөдчисны ёсь йыла-юра гортланьныс.

### ЭН УЗЬ, ЧЕРИ КЫЙЫСЬ



урджык эськө, тэ кө чери кыйин,— шуис өтчыд Митруклы чойыс.— Шландайтан сідз жө-а.

— Мыйөн?— юаліс зонка.

— Важ тывсьыд помсө вунды,— велөдіс

Марина.

Доддын туплясис киссьөм тыв, чумсяс сійөс ориөдлывлөны ветьөк вылө. Митрук сэтысь метр кузьта кымын аслыс тшөтш вундіс. «Мый ыджыд тывсьыс,— мөвпаліс ачыс.— Ичөтика кө шедыштас и. Унасө некытчө лоө солавнысө».

Көрталіс тыв өтар-мөдар помө бедьяс и сюйис ты берегө, коді чум дорсянь зэв матын и вөлі. Пукалө Митрук берегын

и виччысьö черилысь шедöм. А чери оз тэрмась тывйö юрсö суйны. Пукаліс-пукаліс да и вугыртіс чери кыйысь.

Дыр-ö узис, Митрук оз тöд. Но кор садьмис, чери вöлі нин шедöма. Уськөдчис тыв дорö, чуть ачыс ваö оз чеччышт. Видзöдö да, чериыс и шөрланьö на, морыд, турыштчöма, поводнöя кыкыштöма тывсö. Кыскö Митрук ньöжйöник, тökö-тьö лов шысö кутöмөн. Матыстіс дзикöдз да лётöбтіс косінö. Сэссия тэрыба гыпнитіс-водіс чери вылö, кутö, но чери оз нöйтчы, оз вөр. Видзöдö да, сьвтöм чериыс и сьöмыс абу. Падьялö Митрук, босьтны-ö черисö? Татшöм чериыс батьлы эз на шедлы. Лöсялас-ö сійö мамыслы да чойыслы?

Детинка, век жö, пыртіс чериöс чумö. Мам и чой зэв радöсь, кыпыда нюмъялöны, со пö öд кутшöм öдйö и кыйин. Кутшöм бур чериыс, весиг керны оз ков — дась. И Митруклы долыд. Кодлы нö ошкöмыд оз лöсяв!

Воис бать да пуксялісны пызан сайö. Батьыс ошкис жö Митрукöс, рöсолыс пö чöскыд.

— Ветлам коркö тэкöд свежöй чери кыйны, — кöсийысис бать.

Дыр мысти нин Митрукöс веськөдіс батьыс, мый сола чериыс пö ваас оз овлы. Тадзи пö тэкöд Марина чойыд кимöс-титчöма, асланым шомöсысь черисö суйöма тэнад тывйö. Вот сэссия и узь чери кыйигад!

## МÖДЫСЬ ОГ ПОВЗЫ



Б ать эз вунöд кöсийысьöмсö, збылысь нуöдіс Митрукöс чери кыйны. Детинка падмыштіс, кор батьыс сувтöдіс дадювьясöс ичөтик шор дорö да шуис: тані пö и кутам кыйсыны. Митрук чайтіс — ыджыд ты дорö вайöдас, пыжөн ва мышсö кырасны. Öні сійö оз тэрмась чеччыны дадь вылысь: гашкö, бара на тешитчöны да?

— Мый нө шонтан местатө! — шуис бать да кутчысис черө, заводитіс керавны нбөръяс.

— Тани нө кутшом чери? — дышпырысь чеччис Митрук.

— Чериа тысянь шорыс лэччө, и чериыс сэтысь петө.

— Кытчө?

— Юө.

Вис отар вомө бать лөдіс кералом нбөръяс да тшөктіс сы вылө тальччыны Митруклы, потшны виссө.

— Крепыда сулав, эн дзөр, мед оз уйкнит чериыс.

Друг бать лыыштіс көрт пома харейнас ваө.

— Сійө өд сьод кер пом! — серөктіс Митрук. Но сэк жө казяліс, кыдзи сьод мышка ыджыд чери пескыльтчис. И пыр жө кодкө быттьө тувкнитіс Митруклы кокас. Зонка лайкнитчис, лигышмуні кокыс, сэсса и чечыштіс да нырвыв уэвтіс ваө.

Батьыс тшапнитіс сійөс малича юрбөрөдыс:

— Загреки вылас тэнө босьті...

Сэсса батьыс пөрччөдіс зонкаөс, пыдзраліс ва паськөмсө, сэк кості аслас маличаөн кышөдіс. Ырзьөдіс бипур да заводитіс косьтыны Митруклысь паськөмсө.

— Кутшөма тэ манитін менө, дзоля пи, — меліа нин сёрнитіс батьыс. Митрук чөв оліс, көть эськө личаліс жө нин измылом сьөлөмыс. Мый керан, ачыс мыжа; эз кө повзбы, и чериыс эз мын, ачыс эз көтась, бать эз манитчы. Даддьө пуксис да вөлисти шыасис Митрук:

— Ме, бать, мөдысь сэсса ог нин повзбы. Збыль ог!

## ТУНДРАСА КУТШ



итрук — мыйон помнитө — век нин батьыслөн дадь бөжын дзорьявліс, быттьө сэні и чужлөма. Сідзи тай овлө: зонпосниясыд бать дінасджык сюртчөны. Ёд дадов көръясыс сылөн пелькджыкөсь и быдлаті шуркъялөны.

Но талун Митрук йөршитчөма мамыс дадь бөжө. Талун

сійö лөгалö батъыс вылö. Мамыс — аргыш нуöдыс. Аргышыд сійö кызди обоз, сöмын дадьяссö оз вöвьяс кыскыны, а кöръяс. Аргышсö колö нуöдны видзчысьöмөн, сы вöсна мамыс тшöкыда видзöдлывлö бөрвыв, медым дадь эз пöр. Дадьясын кöр видзысьяслөн кöлуйыс, сёян-юан, сэни жö оланіныс, чумыс, тубрасалöма.

Митрук мамыслөн дадь бöжын быттьö домöм кыньпи, окота чеччалыштны, вотöсасьны, панласьны, вермасьны росъяскöд, но полö кольöмысь. Да и мамыс оз лэдз дадь вывсьыс.

Йвла вылыс талун оз жö ёна ышöд Митрукöс. Со тыяс пласътвидзöны. Шоръяс вомöнавлöны туйнысö, но оз жö аргышсö потшöсавны: мамыслы пыр и сюрö вуджаніныс. Васöд нюръясті собöны, найö кушöсь либö сук турунаöсь. Туруна нюрöдыс кöръяс ёна болскöны кокъяснаныс, резöны няйтсö, тешкодя тракйöны дадьсö, Митруклы быдсөн любö лолö. Но öд нюрыс абу помтöм. Паныдасис кö эськö паськыд ю, сэки мамыс быть сувтис и чомъясисны, но юыс оз тыдав некөн.

Сэссия Митрук заводитö мöвпавны — и мöд пöлöс олөмö волö. Кöръясыс быттьö лоöны ичöтикöсь, кыньпиян кодьöсь кымын. Сэки Митрук кöзяин на вылын. Ыджыд кöръяснад öд мат, кольöм төв на öти кöр малича пöлаöдыс скор йылас лэптыліс. Митрук ёнакодь повзыыліс сэки. Со Митрук батъыс моз жö няргалаөн куталö ичöt кöръясöс, лямкаалö аслас ичöтик дадьö, дöзьöритö стада, весиг бöрйö, кутшöм местаö сувтöдас чумсö, кытöни кутас йирсьöдны кöръясöс. Дерт нин, медся нитшкаинас! Векджык аддзö ассьыс стадасö мича мыльк вылысь, югыд ваа ты дорысь. Шылыдынас кöръяс век син улын, а тыыс мытшöд, кöдзыд ваас коді келас? Митрук полö сук расысь, пырасны кöръясыд сэтчö да и вошöны. Митрук чайтö керавны став рассö, но видзöдлö, кутшöм паськыда да тшем быдмö сійö васöдинъясын, и ыркмунаlö сьөлöмыс. Öтнас оз берт, а ёрт абу, гырысьджык чой-вокыс сиктын олöны, гожöм кежас пионерлагерö мунісны. Митрукöс, кökъямыс ар тырас да, локтан воас сетасны жö школаö, октябрёнокөн лоö, оз нин кöр видзысьөн. Но öти гожöм петавлас на тундраас.

Сэсса Митруклы бара на сувтö син водзас тöрытъяыс. Чомныс сулаліс джуджыд мыльк йылын. Гөгөр тыдалісны сэтшөм жö гырысь мылькъяс. А на весьтöд довъяліс съод лэбач. Качліс сійö вылö-вылö, лоліс ичөтик съод чут кодьөн, сэсса из моз уськөдчыліс мулань. Чайтан, пом нин, чорыд изійö пасьму-ніс. Но оз. Дзик нин му дінсяньыс лыйыштліс енэжö и дыр сэнi шывкъяліс бордъяснас ньöти шенасътöг.

Батыс висьталіс: тайö пö тундраса кутш — хановой. Сійö пö көзяин тундраса олысьяс пөвстын. Тайö збой да вына лэбачыс пö некымын верст оз сибöд аслас поз дорö ни ручös, ни кыньös, весиг көин полö сылөн ёсь гыжъясысь. Сöмын пö морт вермö сибöдчывны кутш поз дінö, но морт оз жугöд сылысь позсö. Öд кутш поз дорын пö позьö бура кыйсьыны. Кутш оланін дорö поздысьöны чукөрөн уткаяс, дзодзөгъяс. Кутш пö видзö налысь позъяссö быд сикас зверьясысь. Дерт, оз весь, арнас пö ачыс кутас чöсмасьны утка да дзодзөг пиянөн, но ыджыд чукөрсыйд оз ёна и тöдчы.

Тöрыт батыс шыбитіс дадь вылö капканъяс. Митрук пыр жö сирасис дадь бөжö. Батыс букуыша видзöдліс, быттьö вöйпис: водз пö на тэныд, но Митрук эз чеччы, сöмын ёнджы-ка кутчысис дадь көртöдас.

Шор лунвыв пökатысь öта-мöд бöрсяыс кыпöдчалісны дзодзөгъяс. Митрук первойысь на аддзö татшөм матысянь дзодзөгъясöс, найö шпорөдчöны водзын и бокъясын, мукöдыс дзик көр кок улысь жбыркнитасны, таысь матысса көр боквын чеччыштлö. Серко ыштыліс жö вöтлысьны дзодзөгъяс бöрся, но регыд никсігыр уйыштіс дадь улö. Кутш лыйыштліс енэж-сянь да котшнитіс көрт кодь нырнас пон юрö. Сэсса Серко эз нин мыччысьлы дадь улысь.

Бать ноксис капканъясөн дзодзөг поз дорын.

— Мый нö каран? — юаліс Митрук.

— Дзодзөг кыям, — шуис батыс.

— Сэсса быдтыны кутам, да? Мед оз пыштъявны, да?

Батыс мыйкö сöмын нурбыльтіс вомгорулас.

Талун водз асывнас ая-пия мунісны капканъяс дінö. Во-

исны дзодзөг чужөрө. Митрук видзөдө: өткымынөн оз вермыны чеччыны поз вывсыныс, лёкысь нетшкысьёны сөмын. Митрук төвнас тадзи жө sibдыліс юкмөс дорө малича бөжнас: гудрасис юкмөсас роскөн и эз и казявлы, гөлөс быртөдзыс лои горзыны, кытчөдз эз перыны. Татшөм жө өні көнкө и дзодзөгъяслы, со тай кыдзи пессёны, повзьёмаөсь дзыкөдз и. Мыйла нө сиасисны эськөн, мед нин вөля вылын гулайтөны. Усис Митруклөн сьөлөмыс — абу и ньөти окога быдтынысө найөс.

Батыс чеччыштис даддысь да уськөдчис первойя дзодзөг дорө. Митрук чайтис, сийө өні мынтөдас дзодзөглысь кокъяссө көрт налькыйсь, и гого лэбзяс. Но батыс друг песовтис дзодзөглысь юрсө, дзодзөг турыштчис и лётмунис. Тадзикөн батыс мөдлысь, коймөдлысь. Митруклөн сөдзтысис синваыс, лы кодь ёкмыль тасасис голяас. Сэтшөма лөгыс кутис петны батыс вылө. Юрсө чатөртліс вывлань, думсьыс корсис кутшөс. Сийө здукас сылы окога вөлі, мед эськө тундралөн көзяиныс кокыштитис батысө. Но кутш эз тыдав кымөръяс сайысь.

Сэки Митрук тэрыба сувтис. Дзодзөг поз вылысь казяліс кыйтөм на капкан. Дерт, сэтчө бара на виль дзодзөг шедө. Колө кыйны капкансө, кытчөдз абу на сёр. Со капкан таяныс, сөмын колө сэтчө личкыштны... немтор матын абу. Гашкө, зэв тэрыба чуньөн? Митрук лөсьөдчис батыслы бокөн, личкыштитис чуньнас капкан таянсө и... шедис. Лёкысь горөдіс. Батыс уськөдчис горөдөм вылас:

- Мыйла нө чуньтө сюян, кытчө оз ков?!
- Тэ, тээ-э менө-ө-ө пө-ө-өрийөдлін, — сыркъяліс Митрук.
- Пөръялі?! — чуймис батыс.
- Дзо-дз-дзө... ви-и-ин.
- Вии? Ме? Капканө шедөма вөлі...
- Мыйла эн лэдз-аав?
- Лэдзавны?! — бать гыжъялыштис балябөжсө.
- Да тэ, тэ лёк, лёк... вылысь на сиасин, — Митрук бара гораа бөрддзис.

Батыс вөлі дзыкөдз шөйөвошөма.



у ыылö пуксис кöдзыд төв, кынтис му и ва. Митруклы абу кивыв төлыс, гожöмын моз он котрав. Быдлаын лым толаяс, собны кö — юр вывтйыд. Торйөн нин мустöм детинкалы кузь лунтырьясөн аргышөн мунны. Руныгöны-руныгöны кытчöкö, собöны кöрьяс лымйöд, пом ни дор оз воы. Сиктö пö тай тэрмасьöны. Вöли кö эськö Митруклөн вöля, сийö некытчö эз тэрмась, гудйысис лунтыр лым тола пиын.

Детинкаöс тубралöмаöсь юр вывтйыс, кöр вольясөн да гезйөн кöртавлöмаöсь мамыс дадь бöжö. Тани Митруклы шоныд, ымралö питшöгас, но дöзмöдö кузя мунигад. Муртса на мыччыштас нырсö, пыр и курччас сийöс веж кöдзыдыс. Мамыс сідзи нимтö төвсö, веж кöдзыдыяс пö пуксисны. Митруклы öткодь, веж кöть гöрд, öтмоза кыкнансö мустöмтö.

Рытьявыв детинкалөн заводитö сюмавны кынöмыс, и сийö корö нянь. Марина чойыс мыччис из кодь чорыд няньтор. Митрук гирсйöдліс пиньяснас.

— Небыд нянь вай! — корис Митрук.

— Абу. Веж кöдзыдыс сейис, — вочавидзис Марина.

— Сылөн абу вомыс! — горöдіс Митрук. — Кöдзыдлөн абу вомыс, эн пöрьясь, Марина.

— Но, кынмис инö няньыс, — пыксис чойыс.

— Нянь оз кынмы, сийö абу ва! — оз öвсы Митрук, заводитис сыркъявны. — Көнi небыд няньыс, кытчö лотін?

— Авкоыд став няньсö пазйöма. — Мариналы окота öдйöджык мынтöдчыны зыньгысь детинкаысь. — Ачыд төдан, кутшöм лют сийö няньöдзыд.

Митрук ланьтис. И збыль, Авко ёна радейтö няньтö. Сийö, дерт, и пакöститчис. «Медым волам местаö, медым мынла тайö гезьяссыс, — ыршасис думнас Митрук. — Петкöдла ме сылы, нювсысылы пуж».

Коркө аргышаяс сувтисны чумъясыны, мынтөдисины дадь  
бөжысь Митрукөс. Сийө пыр и ырыштчис Авко вылө:

— Ок тэ, яндысьтөм, пазөдін став небыд няньсө!?

Авко веськодя дзоргис Митрук вылө, исасис, нянь корис.  
Тайө содтөд пужьөдис детинкаөс. Сийө кватитис беды да бөр-  
дигтыр уськөдчис көр вылө, пондис кучкавны сюрас и юрас,  
котралис Авко бөрся, судзөдчис пөвсыштны мыш кузяыс. Мед-  
бөрын Авко ылыстчис чум дорысь — скөрмис жө.

Сэксянь Авко оз нин леститчы Митрук динө, таысь забед-  
нө. Весьшөрө кедзөвтис ёртсө. Детинка өні ачыс төдө: көдзыд  
дырйи и нянь кынмө, из моз чорзьө, аслас синмөн адзылис,  
кыдзи чумын, пач дорын, сывдисины кын няньсө. И сийө бөр-  
лои небыд, чөскыд.



Мөд юкөн

## МИТРУК ПЕҪӨ ТУНДРАЫСЬ

БАРА ТУЙӨ



**Т** айö тулысö Митрук медбөръяысь петис тундраö, сылы төв заводитчигас нин тырис сизим арöс. Сыкöд тшöтшъяысыс парта сайын нин пукалöны, но Митрукöс мыйлакö кольöм арнас вунöдисны петкöдны тундрасысь. Тöвнас эськö и кватитчисны да сёр нин. Шуисны, мед пö ещö на öти гожöм вынсялö. Локтан арнас быть нин сийöс сюясны школаö, стöчджыка кö, нулевöйö. Ставысь тадзи сёрнитисны сиктын: пöрысьяс и посни-

уловыс. Митруклӧн аслас гуся думъяс пӧжсьӧны шоныд малича пытшкас: унджыктор аддзвыны таво тундрасьыс да не вунӧдны. И, дерт жӧ, велӧдчыны пастук уджӧ, медым эз ло прӧста ошйысьӧм ёртъяс водзас, кор чукӧртчасны школаас. Ӧд быдӧн кутас ошйысьны кутшӧмкӧ сямлунӧн.

Тундраӧ петан уль руа тувсовъя луныс торъя нин шызьӧдӧс детинкаӧс. Водз асылын (лунъяс кузьӧсь нин вӧліны) разисны чомнысӧ, тэчисны додыас вылӧ да крепыда кӧрталісны гезйӧн, медым туяс немтор эз вош, сэсся аргышъяс (быд аргышын нель либӧ виӧ додь) стадаыслӧн таялӧм ворга кузя гулыд ягысь лэччисны Печора вылӧ, сувтісны Трӧш сикт горулӧ. Пастукъяс водзӧ вӧтлісны стадасӧ ю кузя, джуджыд лым пытшкӧд. Собисны медводзын вына менурейяс, мича, ён кӧръяс. Митрук тӧдӧ нин, кысь лоӧны менурейясыс, арнас ай кӧръясӧс кодзӧны, сы бӧрын найӧ ёна тшӧгӧны. Митрук кӧсийӧ, медым став кӧрыс вӧлі менурейӧн, но батыс, Макар Саньӧн шуӧны, тайӧ стадаас бригадирыс сӧмын шпыннялӧ пиыслӧн водзмӧстчӧм вылӧ, куш менурейяснад пӧ стадаыд йывмыны кутас.

— Найӧ жӧ нырщикалӧны? — оз сетчы зонка. Тундраыс пӧ найӧс чуксалӧ, тӧлкмӧдӧ батыс, сы вӧсна пӧ чепӧсийӧны водзас, сӧмын ас вӧснаыс тӧждысьысыяс пӧ менурейясыс, вермасны и энотны ёртъяснысӧ.

Аргыш нуӧдысьяс, кызвыныс нывбабаяс, кайисны сиктӧ чай юны. Накӧд тшӧтш и Митрук. Зонкалы эськӧн яндзим кодъ нин бергавны нывбабаяс дорын, но кынӧмыс тшӧктӧ. Чомйын олысьяссӧ, кодъяс оз петавлыны стада дорӧ дежуритны, батыс шуӧ «весь нянь сёйысьясӧн». Та вӧсна Митрук сюртчӧ мужичӧйяс дорӧджык, но оз век сы ног артмы, мамыс борд улӧ кыскӧ, кор кынӧмыс сьумалӧ либӧ кокъясыс кынӧны.

Бӧджыд пызан сайын, кӧні руаліс быд сикас сёяныс, унаӧн паськыд блюдыясысь пӧлясьӧмӧн ырскисны пӧсь чай. Митруклы ныр улас вайисны ыргӧн кружкаӧн пӧжӧм йӧв, весиг мырдгӧрд лоӧма пӧжсьӧмысла, вылысас гӧвкъялӧны вый гӧгыльяс.

— Ю, пиё, — ышловзё гёрд ковтаа лёсьыд чужома Серафима, сідз шуоны Митруклысь мамсё. — Мыйкё тай он и нюжав, загреки, медбёрын школаад оз босьтны.

— Сэтён некодос оз мерайтны, — улё лэдзё синъяссё Митрук да став вынсьыс кабыртё йёв кружкасё. Но тайос пызан сайын некод оз казьяв: налён асланыс тёжд да сёрни. Зонка тёдö: аслас арлыдаяс серти сійö ичөтджык тушанас, и кор казьтылёны та йылысь, морёсас төв ныр моз лыбё водзасьём, кодос век колё кутны ас пыткас, мырдён пөдтыны. Пызан сайын ставён шоналісны, ыпъявны кутіс бандзибыс и Митруклён.

— Пёра сэсся аргышъяс дораным лэччыны, — шуис колльөдчысь сиктса нывбабаяслы Митруклён мамыс.

Митрукос завидьпырысь колльөдісны ас коддьём ёртъясыс.

— Тундраыс өд тасянь ой ылын!

— Көнешнө, сэн пө весиг пуясыс оз быдмыны.

— Медбөръяысь өд нин мунö. Да өд, Митрук? — нускыштис пөдөм нырнас орём пеля шапкаа Семö. Митрей чөв олö, сылы завидьтөм вöсна тадзи шуис Семö, энлыв пö, регыд и тэнö домаласны миян моз сиктö.

— Эн жö миянös вунöд, — чилöстис ёсь гөлöса Даша. И та вылö Митрук немтор эз вочавидз. Кыдзи нö позьö вунöдны мортös! Митрук весиг көръяссö оз вермы вунöдны, став менурейсö төдö. Митрук чöла лөсьөдчö мамыс додь бокö, кызмырдөн бергөдö гөна маличанас зэлөдөм сьылісö кольччысь ёртъясланыс:

— Метөг энö тышкасьой!

— Кодкөд нö тышкасьнысö, дзик некодкөд да, — ырыштчö век на чөв олысь крепыд тэчаса Максим нэриник Семö вылö, нетшыштö сылөн юрысь шапкасö да шыбитö көр кок улö. Тайö здукö мамыс вөрзёдö дадювсö. Митрук мый вынсьыс песовтö дженьыд сьылісö да видзөдö мышкас. Максим да Семö нетшкёны öта-мөдныслысь фуфайканысö.

«Со и тышкё воисны. Мыйла и татшөм неладнөсö шуи», — вомалö асьсö Митрук. А Максим да Семö, дерт, эз Митруклён

шуом вöсна зыкас воны, налы окота жö кытчöкö Митрук моз туйö петны, но некод тай оз чукöст. Бать-мамныс мöс видзысьяс, а мöскыд, быдөн тöдö, тундра кузя оз войлы, картаыс да сиктгöгöрса вöрыс, веж туруна лудыс муса сылы. Дерт, кöнкö, та вöсна и лöгсö песöны Максим да Семö.

### КЫТЫСЬ ЛОÖМА ТÖЛЫСЫС



ундраö петысь аргышъяс бур здук рöдтисны стадаөн таялём шылыд туй кузя. Көръяс писькöдчöмаöсь паськыд Печора нылыд. Митрук тайöс пыр жö гөгöрвоис, кöть визувтысь ваис оз тыдав кыз йи да лым улас, лыадор баддьыс нёровтчöма водзлань, быттö туйсö индö. Тайö тувсов ытваыс сийöс сідзи песовтöма. А кыркöтшъясын джуджыд козъяс дйтшвидзöны, зумышöсь, ок, абу кокни налы, ружтöмныс татчöдз кылö, ульдём лымйыс личкö.

— Мамко, мыля козъясыс ружтöны?— юасьö Митрук.

— Тулыс локтö, шондöдас, пиö.

Көр стада некөн эз тыдав. «Кутшöм öдийö усыйсьöмаöсь»,— шензис Митрук. Но абу сы ног вöлём, стада пырöма векныд ю воргаö, кодi войвывсянь локтö Печораö. А дзоля юыд чукуыла, быттö и кылö водзас көр зыкыс, а синмыдлы оз на тыдав.

Сэсса тайö Лая ю кузяыс мунисны некымын лун, вой кежлас кайласны вöрас, чомъясясны, көръяс южмöдöны коз диньяссö и асывнас бара ю вылö найöс вöтлöны. Зонкаöс мудзтис и дöзмöдiс кузь туйыс. Торъя нин сьöкыд садьмынысö водз асывнас, пемыдөн на шоныд вольпасысь чуксалö мамыс да тшöктö мыссыны сöника ваён, көрт пачыс тшындö да синтö майтöг быг моз сёйö. Уль поводдяыс мыжа, тшыныс, кодi пычкысьыштас труба розьöдыс, а кодi бөр лэччö мокотаöдыс, чом юрöдыс, пытшкас. Ставөн öтвывтчöмаöсь Митруклы па-

ныд — мамыс и поводдяыс, и торъя нин батыс, коді некодлы шойччөг оз сет, век быдөнөс тэрмөдлө.

— Мед, пиук, дзоньнас төвсә гөсүд сылас,— шпынняялө чай юигөн батыс.

— Мед,— чорзбыштөм гөлөсөн шыасьö Митрук.— Ме тэ моз жö бригадирөн лоа, быдма да.

— Бур делö, пиук, кынöмыд пöt лоас яйнас,— сералö батыс.— Гашкö, и менö на вердны-чöсмöдлыны мöдан.

Митрук кузя видзöдлө батыс вылö, көсийö тöдны, шмонитö али збыльысь сёрнитö батыс.

— Ю чайтö,— небыда тшöктö мамыс Митруклы.

Коркö сәсся эновтисны жö чукльöдлысь юсö, кайыштисны шор кузя да петисны паськыд нюр вылö, вöрыс öдвa доръясас тыдыштö, а местаясөн и оръясьыштöма, öти еджыд нюр сәтшöм жö мöдöс вежö, вöрас оз и пыравлыны, помся восьсаинти тарöдöны, кок улыс чорыд, турöбыс, жвичкысь төвъясыс кузь кад чöжнас бура топöдöмаөсь лымсö. Воддза серти ёна югыдджык лоис, ставыс син водзын вералö, синтö ёрö. А кор шондi мыччыяс, ывлаыс ойдöмөн-ойдö югөрнас. Пастукъяс сьöд öчкиасисны. Митруклы вичмис жö öчкиыс, мамыс вурыштiс весиг көвнас малича юрас, медым эз вошты, но детинка регыд бөр резьöдiс, кодыр батыс додь бöжö пуксис, некод сiдзисö оз новлы. Батыс век стада дiнын бергалö, то водзö петавлас, то бөрö косавлас. Бригадир кодлыськö мыйкö юасяс либö чорыда öлöдас кутшöмкö пастукöс и бара водзö лэбовтö. Макар Сань удж вылас яр, Митруклы чайтсьö, бригадирысь пастукъяс польштöны, а сiйö, көть ичöt, ньöти оз род, век дась мыйкö юавны, но батыс унджыкысьсö оз көсийы ськöд баитны, тшöкыда зумыштчöма, либö кытчöкö ёна тэрмасьö, быттö көинöс суödö. Дадьнас сук раскöд келас либö шор гуранö дзумгысьлас, некутшöм дöзмöм оз петкöдлы. Дерт, ставыс тайö детинкалы любö, он öд мамыд даддьын вуграв. Но мый тайö? Кытчöкö лэбыштöма ныр вывсьыс сьöд öчкиыс.

— Айко, вошти öчкиöс!

— Лешак пи... О-о-о! — скöрысь горöдiс көръяс вылö батыс.



Тундрао петысь аргышъяс рөдтісны шылъыд туй кузя

ыс да ньöv моз лыйыштіс водзын съодасьысь стадалань. Звирк сувтöдіс дадювсö пастукьяс дорö, шлопкис муас хорейсö. Ас костаныс варовитысь пастукьяс быттьö тшöкмунісны, шуны дасьтöм кывьясныс вом дораныс кынмалісны.

— Коді Лыска шор пöлöныс көр бöжсö нуöдіс?! — чорыда юалис бригадир. Öти том пастук довкнитіс олыштöм мужичöйлань, коді мудзöм кутш моз куткырвидзис аслас дадь вылын.

— Лöбей!.. — шыасис сы дінö бригадир и сэтшöм чорыдöс гаровтіс, мый весиг Митруклөн малича юрыс лыбліс, — кутюлөн али мый синмыд, вөр діас важенка челядьясьöма. Кык час мысти мед стадаас сійö вöлі!

Паськыд тасманас мыш вылас нöб моз лыбöдöм съод маличаа Лöбей быттьö чой горув гывдöдчис вильыд дадь вывсьыс, сувтіс да юрсö лэдзыштіс. И дзоньнас кызкö быттьö топöдчис да чиніс. Митруклы вöлі жаль тайö кывзысьысь да чöv олысь дядьöыс, сы вöсна торья яндзим вöлі батыс вöсна. Дерт, мыжа Лöбей, эз казьяв туйсö, либö дыш вöлі трöпасяньыс ылітіджык гаровтчынысö, но мыйла батыс та вöсна ку письыс петö? А сійö быттьö кывзöма Митруклысь мөвпьяссö:

— Тэ бара кытчö öчкитö керин?

— Ог тöд! — збоя шуис Митрук. — Тöді кө, бөр лэпти.

— Ак тэ, дадь бöж сисьтысь, ещö көсьян пастукөн лоны.

Аддзылін важенкасö пуяс костсьыс?

— Эг. Байдөгьяс вылö видзöді, көчьясöс синнам корси.

— Ладнö, көч пастук, öні сэсса кепысьнад тупкы синтö, нинöм тай тэныд видзöднысö.

Дерт, Митрук эз дзедьсы кепысьнас шонді югөрьясөн öйысь тундраысь, а сюсьджыка на видзöдіс гөгөр. И кыззи он видзöd! Буско чуйдас кыз расысь байдөгьясöс да найö дзик дадь вывтійыс шутөвтöны. Ылісяньыс байдөгьясыс кажитчöны лым чир кодь еджыдöсь, а збыльвылас абу сэтшöмөсь, вижоватöсь. И сэтшöм сөстөмөсь тайö ловья ёкмьялысыс. Көнкө öтарö мысьöны пушыд лымнас. А, гашкö, найöс мамыясныс мырдөн весалöны?

Митруклы асывнас мамыс ныр улас пунктö тазійын сөніка

ва. И майтөг мыччө, медся нин некытчө туйтөм майтөг быггыс, сёьсь, гашкө, суйлан китө тазьяс, а век быттьө кылө нильөгыс.

— Сьылитө тшөтш мыськы, — велөдө мамыс.

— Зырта, зырта, — кайтө Митрук, ачыс киняулас шуркнитлас кисө да кос кинас ниртө сьылисө, со пө вöснявны нин кутис. Мамыс казялө мудеритөмсө да гусьоникөн кисьтыштө йиа васө ниртөмсьыс доналөм сьылі вылас. Митрук лёкысь чарөстө да та бөрын помалө мыссьөмсө...

Лым тупыль моз көч гөгыльтчис, пель йылас сөмын сьөд чут тыдалыштө, Буско и налы узыны оз сет.

— Айко, көчыс! Водзыраным!

— Лыдды, пиө, кымын көч аддзылан луннас да рытнас висьталан.

Некымын лун мысти байдөггьясыс лоисны бара еджыдөсь, көчьяслөн сьөд чутыс пельсьыныс воши. Сэсья и асьныс кытчөкө вошисны.

— Аддзылін көчсө? — өтчыд шыасис батыс. — Гөныс лёкмыштөма нин. Тулыс локтө!

— Эг, — шыасис Митрук.

— Узян али мый?

— Вугрөдлө, бура сөйи да, — сөрис Митрук, детинкалөн заводитисны доймыны синьясыс, ру пиын нин моз мыччасьөны дадювса көрьясыс. Колө эськө юөртны батыслы, но сийө, төдөмысь, ёна скөрмас да вөтлас дадь боксьыс мамыс дорө.

Кодыр дзикөдз ставыс пемдіс син водзас, Митрук батыслы юөртис:

— Кутшөм пемьд вой пуксис!

— Эн древит, — шыасис батыс, — шондіа тай.

Митрук виччысьтөг бөрддзис:

— Синтөмми! Луньюгыдыс воши-и!..

Батыс сувтөдіс дадювсө:

— Лёк тай делөясыд, Митрей. Ме тэд висьтавлі, тупкы синтө кепысьнад! Эн кывзысь, синтөг өні ов.

— О-ог! Кепысьыс өд көдзыд, кыз нө өтарө тупка, — сыркьялөмөм бөрдіс детинка.

— Ладнө, пастук, тырмас няргынытө. Сійө тэнад уна югыдсьыс чегсис синмыд. Мунам чом дорө, шоныд ки чышкө-дөн көрталам синьястө и здукөн бурдас.

— Збыль?— нюмдіс Митрук.

Дерт, Митруклөн синмыс здукөн эз бурд, дыр ветлөдліс мамыс дадь бөжын көрталөм синьясөн. Быдсяма думсө песө ас улас зонка, абу велалөма весь овны, вир гажтөм сылы, көть сьөлөмыс потө шогысла. И медым дзоньвидза колис сьөлөмыс, детинка лөсьөдалө водзө вылө быд сикас планьяс. Наперво сійө дырсө оз кут велөдчыны, мед сэсся эз индыны зоотехник-өн. Зоотехникыс Митруклы кажитчө чомьяс медся пустой мортөн, некод сылысь немтор оз юав, ачыс нинөм некодлы оз тшөкты, куйлө чом пельөсас да сөмын шпуткө, виччысьө, кор нывбабаяс ныр улас пуктасны ыджыд тшөгыр яй да пөсь шыд. А батыслы весиг лючки чайсө юны некор, ырситас пөсьсө стөкан дорсьыс, тшөкмунлас да бара кодлыкө кутшөмкө совет сетө.

Дерт, Митрей оз мөд ставсө батыс моз вөчны, арся зэра войяснас, кызди өні батыс, оз кут мөдөдавны пастукьясөс дежуритны стада дорө, медым шойччөны чомйын. Лөсьөдас зэв гора патефон, кыпөдас чом юрас и кутас сэтысянь сяргыны гора сыланкывьяс, медым уна километр сайөдз юраліс, вөтліс көр дорысь көиньясөс. А пастукьяс войбыд мед узьөны чомйын.

Бур мөвпьяссьыс Митрук эз и казьявлы, кызди вугыртсьө-ма. Садьмис да юаліс мамыслысь:

— Вой али лун өні?

— Вой, пиө, вой, — ылөдліс Митрукөс мамыс. Вөлі шондіа лун. Мамыс чайтіс пиыслы тадзикөн бурджык лоө — войнад өд синтө куньөмөн видзөны.

— Сап пемыд?— юаліс Митрук.

— Сап-сап пемыд.

— Кодзувьясыс выимөсь?

— Тшем.

Недыр мысти Митрук бара шыасис:

— Кодзувьясыс нө ловьяөсь али кулөмаөсь?

Мамыс здукөн немтор эз вермы вочавидзны, кызкө на йылысь сылы некор и мөвпавнысө, помся вежөрыс и кыис тырөма чомгөгөрсә уджөн. Кодзувъяс кызди кодзувъяс. Найөс енэжас вурыштөма, оз некодлы мешайтны.

— Мый нө, мамө, пельтөм али мый, он сёрнит?

— Кодзувъясыс, мада пиө, найө ловъяөсь жө,— мыйлакө вшловзис мамыс.

— Ме сідзи и думайті, мися, читкырасьёны мукөддыр-йиис.

— Сійө, дзоля пиө, кулөмаяслөн синъясыс кайөмаөсь небесаас, кодъяс овлөмаөсь мянөдз зэв-зэв важөн,— мамыс-лы өні дум вылас уси кодзувъяс йылысь ыджыд мамыслөн висьтасьёмыс.

— Мыйла найө сэтчө кайөмаөсь?

— Өд вылісяньыс бура тыдалө. Найө, дона пи, абу прөс-төй синъяс, кызди мян, кодъяс казялөны сөмын матысса рөмъяс, наын кызд быттьө мян сөстөм ловным сэтчө поздысьөма. Найө ставсө аддзөны и казялөны, стрөга видзөдөны, медым ми эгө дзугөй татчөс муыв олөмсө, ставсө аддзөны, оз-ө зыксьыны йөзыс ас костаныс, оз-ө лөг пестыны өта-мөд выланыс. Өти кывйөн кө, сөстөма-ө видзөны, оз-ө пежөсьтыны мян пөляслысь коркөя оланінсө.

— Тундрасө!— горөдіс Митрук.

— Да, пиукөй, тшөтш и тундранымөс.

— Ок, мудер вөлөмаөсь мян пөлясыс,— шензьө Митрук,— весиг кулөм бөраныс оз узыны. Мамко, тэ сэтчө жө каян коркө...

— Ог төд, мада пи, мичаа тані колө овны, медым сөстөм сөвествөн лоны выльөн локтысь йөзыслы. Ог төд, сямма-ө? Тэнө со колө лючки быдтыны и.

— Метө быдма ачым нин,— өвтыштис кинас Митрук. Зонкалөн ыпъяліс лолыс. Өні сылы вөлі гөгөрвоана, мыйла Марина чойыс, кодөс мамыс ыдждөдлө невеста нылөн, нимтө сійөс кодзув синмөн. Вөлөмкө, абу и лектор, а сійө дузьявліс.

Серафима дышиника тэрмөдлө хореинас дадювсө да вом-

горулас нуодö кутшöмкö мыла шы. Дум вылас любö: кокниа мынiс пиыслөн юасьöмысь. Серафима неуна сöмын велöдчыштöм нывбаба, веськыда кö шуны, кутшöмакö полö Митруклөн пискöслунысь. Некод Митрук кодь эз вöвны. Мыйла тайö бөръя кöйдысыс торъя дöсадитчысь?

— А зэрыс кысь? Кодзувъяслөн синваыс петö?!

Мамыс ышлолалiс да ниртiс вазьöм кокошник увсö, со и матö воштiс пиыс. Шуны веськыда: ог тöд, дерт, сэсся Митрукысь бурён он мын, сэтшöм сылөн пöраыс — быдтор вылö виччысьö стöча шуöм.

— Пиö, сэн кузя колö висьтавны. Школаад мунан да уна тöдны кутан. Эн тэрмась!

— Тэ мен дженьыда шу, кузясö быдөн вермö. Собраниеяс вылас кузяа сёрнитöны да ме сэтысь нинöм ог гөгөрво.

— Эн ветлы да и. Некод тэнö сэтчö оз кор.

— Айко ветлö да. Мамко, тэ менö он ылöдлы. Кытысь, мися, зэрыс?

— Загреки тай лои, — пойгыштитiс дöзмöм Серафима. — Коркö эськö тэнад прабабыд, а менам бабö уна висьтавлiс зэр да турöб йывсыс. Гашкö, мыйкö нин и менам дзугсис, тэ кодь на öд жö вöли.

— Висьтав, мамко!

— Дзоля пиö, Митрукö, коркö зэв важөн, кодыр сöмын на локталiсны йöзыс тундраас, эз öд мян моз войлыны көр даддён — ветлiсны подён. Уна кöмкот кисьтiсны, уна лызь пыдöс ниртiсны. Көръясыс полiсны мортысь, кызди кöчьяс дзевсясисны сук расьяс пытшкö либö ризьялiсны-котралiсны паськыд эрдьясöд.

— Мый нö сёйисны йöзыс? — кывлысис Митрук.

— Кыйсьысьясөн сэки вöлины найö, кодлы мый сюрыштас, сийөн и пöткöдчö. Зэлыд ньöвьясысь лыйлiсны зверьясöс. Дерт, медыджыд прöмыснас вöлины көрьяс. Кыйлiсны и уна чери, чукöртлiсны быд сикас вотöссö.

Митрук чöла кывзö зэр йылысь мойд.

— Овлöма тундраас Яб рöд. Зэв сюсь кыйсьысьяс вöлö-

маось. Торъя удал вөлөма өти молодеч Яб Каля. Век уна прөмыс вайлөма. Өти тулысө (став вьльторыйс чужө тулысын) сийө лыяс вель уна көрөс. Усьөм важенка диньн, вөлөм, бергалө ичөтик көрпи. Жальыс петө мортыдлөн, ваяс мездорас чом дорө ичөтөс. Шыдөн вердасны, няньөн чөсмөдасны. Зэв сибыд көр быдмас, быдтор кывзө мортлысь. Сувтас лым усьөм бөрын көзяиныс лызь вылө, көрыс (кучик гез сылы морөсас донөма) котөртө-кыскө көзяинсө. Тадзинад Яб Каля ещө ылітіджык кутіс лэбавны, уна прөмыс вайны. А мөд тулыснас бара выль көрпиянөс вайөдіс чом дорө. Сэсся көрыд ачыс паськавны заводитіс, дзонь кипом стада чужис. А Яб Каля век ваялө содтөд көрпиянөс. Сэсся стадаыд зэв ёна ыдждіс, лоис быттьө сьөд вөр ді чом дорын. Сёян-юан и көм-пась ставлы тырмө. Том йөз весиг энөвтисны лызьяснысө, вөчисны дадыяс да котралөны дадюлөн, зіля дөзьөритөны стадасө, этшаджык мөдісны кыйсьыны.

Яб Калялөн вөлі ыджыдджык вок Яб Кырныш. Сийө эз радейт бергавны стада диньн. Видзөдө Кырныш шог синъясөн стада вылө и шензьө: со пө мыйта добраыс, а воддза серти унджык на нокыс вичмө. Некутшөм шойччөг огө төдө. А вокъяс гигзьөны, эн пө абутөм шогтө пес, удж нокыс пө мянн и гажлуныс. Кузяа очсовтө Кырныш, узьны пө көть эськө во джын вольпасысьс чеччывтөг. Өти турөба арся войө мырдөн кутасны ыстыны Кырнышөс стадаө, медым видзис сийө көръясөс горш көинъясысь. Ок, и скөрмас Кырныш, чөскыд унмөс пө мырдинныд пеж йөз, ок, пө и каитчыны мөданныд таысь. Мудзөм пастукъяс эз пыдди пуктыны Кырнышлысь кравзөмсө, регыд чорыда унмовсисны шоныд чомйын.

Кырныш сийө войнас пышйөдіс стадасө. Виччысьөны лун, мөдөс, вежон, а Кырнышлөн дукасыс абу. Казялісны, мыйкө неладнө, заводитісны корсьысьны. Өтилаө лэбовтлас Каля, мөдлаө уськөдчылас. Весиг некөн туйыс оз төдчы. Гусялөма пө Кырнышыд мянлысь көръястө, юөртис чомйын Каля. Ок, пө дыр ковмас корсьысьны. Виччысьөй пө, көть из улысь перья да вайөда сийөс. Бөрдігтыр мөдөдісны Каляөс чомсаяс туйө.

А Кырныш век вѳтлѳ и вѳтлѳ стадасѳ, асиввылѳ нырвизьсѳ кутѳ. Кежис аслас рѳдлѳн туйысь. Яб рѳд шондѳ паныд да шондѳ нбылыд ветлѳсны. Видзѳдѳ Кырныш, Из гѳра паныдасис, колѳ пѳ вуджны тайѳс, кайтѳ ачыс, сѳнѳ пѳ мѳд му заводитчѳ, сѳсь пѳ некод нин менѳ оз суѳд.

Вуджис Кырныш Изсѳ, кыйсьысьяс паныдасисны. Кытчѳ пѳ, молодец, туй кутан да кутшѳм рѳдысь. Яб рѳдысь пѳ ме, Кырнышѳн шуѳны. Эг пѳ кывлѳй сѳтшѳм рѳдсѳ. Кырныш нюмьялѳ ас кежас, бур тай делѳыс, йѳз муѳ тай восьѳма. Юасьѳ Кырныш выль йѳзлысь олѳм-вылѳмсѳ. Жеба пѳ олам, прѳмыс лѳка сюрсѳ. Немтор пѳ, киргыштіс Кырныш, ме пѳ тѳянлысь кокньѳда олѳмтѳ, дѳзьѳритѳй пѳ менсьым кѳрьяссѳ, сѳѳй-юѳй, сы пыдди пѳ меным шоныд чом сувтѳдѳй, небыд вольпась лѳсьѳдѳй, и медым чом шѳрас век би ѳзѳйс, а би вылас ыджыд пѳрт ѳшалѳс, кѳнѳ эськѳн век пусис кѳр яй. А сѳянсѳ ваялѳс меным ныр улѳ сера пу тасьтѳѳн тѳян рѳдысь медся мича аныс. Недыр сарпѳисны охотникьяс гынмѳм балябѳжнысѳ, ладнѳ пѳ, Кырныш вок. Ѳнѳсянь пѳ ме абу вок тѳянлы, а бур кѳзяин, каргыштіс Кырныш.

Корсьѳ Яб Каля Кырныш воксѳ во, мѳдѳс... Дзоньнас тундрасѳ кытшовтіс аслас кѳр кысѳн кышѳм тѳрыб лызьяс вылын: некѳн Кырнышыдлѳн дукуыс оз кыв. Сѳсся Из сайѳ вуджис, мурталѳ верстьяс, кѳмыс нин киссян выйын и маличаыс розьяса. Юасьѳ кыйсьысьяслысь, энѳ пѳ кывлѳй менам Кырныш вок йылысь. Огѳ пѳ тѳдѳй сѳтшѳмсѳ. Олѳ эськѳ Сосьва бокын аслас стадаѳн бур кѳзяин Кырныш, но шуѳны сѳйѳс рѳдтѳмѳн, ѳтнас олысьѳн. Гѳгѳрвоис Каля, код йылысь сѳрнийс мунѳ, уськѳдчис Сосьва вылѳ. Гажа пожѳма яг шѳрын куим чом сулалѳ, час пѳ, думайтѳ ачыс, пырала да кѳть шонтысьышта. Пырис медыджыд чомьяс. Чом шѳрас кос пѳпу пескысь лѳсьыд бѳпур ыпьялѳ. Би весьтас мѳтырьяс вылын сьѳдасьѳм пѳртьяс да чайникьяс ѳшалѳны, чѳскыд дукѳн ѳвтѳ. Том ань тѳрыба вѳрѳ, сѳян дасьтѳ. Чом бокас еджыд неблюйяс\*

\*Неблюй — куим тѳлысся кѳрпилѳн куыс.

вылын, юр улас да бокъясас дзодзөг пуха пушыд юрлөсьяс,  
куйліс кутшөмкө ловья гөгыль, не то зверь, не то морт. Кы-  
нөмыс ыджыд вутш моз мылькъясьома, кокъясыс да киясыс  
дженъыдикось, быттё еджыд гоблөн подъясыс, сьыліыс да  
пельпомыс өтлаасьомаось, чужөм вылас сөмын вом потасыс  
да син вурясьясыс тёдчыштёны. Зырало чукъя кынөмсө да  
лөсьөдө ладывв сімөм гөлөссө:

— Лөсьыд жө нин овнысө,  
Кор няня-сола.  
Некодысь дзик повнысө,  
Кула да на ола!

- Коді нө тайө? — юалө Каля мича анылысь.
- Миян бур көзяин Кырныш, — вочавидзө көзяйка.
- Здорово, Яб Кырнышө, — горөдіс Каля.
- О-о, кодкө нө Яб рөдсө төдысь...
- Яб Каля ме! Вокыд.
- Чайті, Яб рөдыс ставнас нин сгинитіс. Но, сідзкө, тэ  
ловья, гөлөсыд тай бура кылө.

Яб Каля джын көрсө колис Из сайса пастукъяслы, аттьоа-  
ліс дөзьөрیتөмсьыс. Кырнышөс скойис гөн мешөк пытшкө,  
көрталіс крепыда аслас дадь бөжө, медем туяс эз усь, медем  
эз пышйы. И мөдөдчис корсьны асьыс рөдсө.

Вайөдіс стадасө Яб Каля бать-мамыслы вижөдөм сямөд  
чөм дорө да жалысла синваыс доршасис, пөрысь мамыс да  
батыс беддён ветлөдлөны, дзоля чойясыс да вокъясыс кулө-  
маось тшыгла. Сэтшөма ставөн омөльтчөмаось, весиг рад-  
лынысө оз вермыны.

— Мый нө сэтшөм ыджыдсө, кутшөм эмбур дадь бөжад  
кыскан? — юаліс батыс.

Каля чөла разис мешөксө.

— Кырныш тай! — серөссисны бать-мамыслөн кельыд чу-  
жөмъясыс, пөим бусөн пыркнитіс лөглуныс.

— Кутшөма тшөгөма. Дзик тюлень кодь лоөма, — шен-  
зисны ставөн.

— Колө пестыны ыджыд бипур, — лөгысь шуис батыс. —  
Мед жаритчө миян вир синва вылын чөжөм госнас.

Кор нин ыпъяліс яр би да ылөдз резсисны гөрд киньясыс, мамыс лэптіс кисө:

— Тайö му вылас быдөн чужö и быдөн кулö. Тайöс абу мортөн думыштöма. Сідзкö, сійö приговорыс, кодöс ми лöсьö-дам, Кырнышлөн, кызди быдөнлөн, эм сьöрсьыс нин. Оз ков тэрмасьны. Вай юалам ассьыс, мый сійö көсийö, кызди чайтö вештыны мыжсö.

— Дона мамöй! — бöрддзис Кырныш. — Көть кызди мыждöй, сöмын кольö ловйөн!

— Но тэ вунöдін рöдтö. Вузалин чужан мутö! Сетам тэнсьыд лытö вильöдны көиньяслы! — горзисны шызьöм йöз.

— Ланьтö! — лэптіс кос кияссö мам. — Кырныш пийö, грек ылö менам тэнö чужтивсьöма. Мыжа ме таысь бур йöз водзас. Ёра öнi тэнö, аслам морöсөн верданторийöс. Овны тэ кутан му вылас дыр-дыр. Кытчöдз йöз костын кутас ветлыны лёклун, кытчöдз йöзыс оз вермыны мездьсьны сыысь. И лоан тэ тайö чассьяньыс ме кодь жö пöрысьөн да эбöстөмөн.

Мамлөн ёран кывъяс бöрын Кырныш заводитіс йöз синьяс водзын укшальмыны, дзормис юрсиыс, көрсис чужöмыс, нюжаліс щöкаыс.

Абу тайö тундраса Кырныш, а пез рака, Изьватас ногөн кө, куваркан! Тадзи нимтісны сійöс йöз.

Куварканлы джынвийö киссьöм дадыö лямкаалисны кык пöрысь сустуй\* быкөс да лэдзисны туйö, мун пö кытчö көсьян.

Мунö Куваркан лун, мөдöс, вежон. Зэв ньöжийö эбöстөм көръяс тувчалöны. Аддзö öти мыльк вылысь изйысь тэчөм чом. Шензьö, быд сикас чомсö аддзыліс: сямöдысь, пу кышысь, көр куясысь, а медым изйысь, эз паныдасьлы. Сувтöдіс дадывсö, гөгөрбок видлаліс чомсö — лөсьыд. Төдчис мыйкө öдзöс кодь, вештіс öти из да пырис пытшкас. Чом шöрас туплясисны сисьмөм лыяс. «Кодкө на овлöма», — думыштіс Куваркан. Сійö эз төд, веськаліс Гурей ылö, кытчö дзевлісны кулөм бöрас

\*Сустуй — жев.

рöдысь медся пыдди пуктана мортöс. Гурей тундраын оз тшöкыда паныдасьлы, либö найöс пазöдö кадыс, либö рöдын зэв пыдди пуктана мортыс чужлö гежöда.

Куваркан овмöдчис Гурейö, дерт, сэнi абу шоныдыс, но көть чизыр тöлыс оз сэтшöма жульöд. Öти тöлөн и кокалисёйис сустуй быкъяссö Куваркан старик. Кокыштас сöна кын яйсö да кравöстö чирöм гөлöсөн, казътылö Из сайса олöмсö.

Куваркан пемыд войяснас вугралiс кöдзыд чомйын, а кор мыччысьлис шондi, мокота розьöдыс, чом юрöдыс, петавлис ывлаö, куткырвидзис сьöд из вылын да шонтiс пöрысь лысьöмсö. Войвывса шондi эз вичмöд шоныдсö. Помся бонзьöдiсны чизыр тöвъяс. Куваркан нöшта на омöльтчис, дзикöдз воштiс мыгöрсö, кокъясыс крукыльтчисны, көрсьöм киясыс чурвидзöны няр бордъяс моз. Пиньясыс киссисны, öд сийö лөгысла помся герчкис наөн. Сöмын быгалöм юрыс ылöдз тыдалiс сьöд изъяс костысь.

Öтчид Куваркан чом дортi прöйдитiс дадюла:

— Шоныд-ö из чомъяд, Куваркан дядь?

— Ка!— мыччис юрсö мокота розьöд Куваркан.— Тэ öни мекöд пиньтö кеслан, а та костi стадасьыд челяяссö роща пытшкын кулялö аслад вокыд. Сийö шоныд малича кутас новлыны, а тэ коньöр тöвнас гегдан.

— Кысь тöдан?— зумыштчис дадюла.

— Ка! Лэбавли, виччыся, кор помалас, синъяссö да кывсö кокала бöрыннас.

Дадюла войöдiс вокыс ордö. Сийö нюжвидзö дадь вылас.

— Эштiн?

— Помалi уджöс да шойчышта.

— Мудзин? Тэрмасин?

— Да,— вокыс чайтiс, мый мöдыс юасьö чом дорö пес вайöм йылысь, öд сийö збыльысь пöсялис сук раскысь крукыль уль россö кыскалiгөн.

Вокъяс вирöдз тышкасисны. Кор вежöртiсны, весьшöрö, вöлөм, зыксьöмаöсь, но сёр нин вöли, öтиyslөн ордлыясыс чегъясьöмаöсь, мöдыслөн сойыс пескыльтчöма. А Куваркан

аслас чом пытшкын гигзьё-сералё, изъясис быдсён вөрöны.

Бара кутшöмкö дадюла Куваркан чом дорті войöдö.

— Куваркан дядьö, лытор оз ков?

— Шыбит, абу кö жаль.

Дадюла гольöдiс-кисьтiс сöза\* лыяс.

— Тöрыт лэбавлі тэнад другыд чом дорö, некутшöм лы оз шыбитны, ставсö асьныс нятшкöны. Эг нин нинöм кöсий шуны, дыястö эн жалит да, уважита. Казявлiн, свежöй лым вывсьыс кок туйсö, öтка кöр чом дорад волö. Чайтан, кöр сійö, солатор исалö. Морт волö, кöр кок кöм пыддиыс кокас скойö.

— Эн аддзыв рожасö?

— Медся дона другыд. Ка, муса гöтыртö кöсий пышиöдны. Войöдiс дадюла гортас, бун-бос нöйтiс гöтырсö.

Лэбöны öта-мöд бöрся вояс. Тундра пасьта шум-зык нöбалö. Быдлаын кылö кöинъяслөн пурсьöм. Зыксьöны рöдьяс, рöднöй вокьяс, гозьяяс. Видзöдöны, заводитö киссьыны мувыв ладыс. Кодкö кö казявлас Куварканлысь радлöмсö, бара шогö усьöны, быть пö нин зык лыбас. Оз тöдны йöз, кыдзи мездысьны найöс суöм лёк рöкысь. Öтияс вöйпöны, колö пö сотны Куварканöс, сысянь пö Лёклуныс, кыдзи жар дырiи холера висьöм паськалö.

Неöтчыдысь скöрмöм йöз уськöдчылісны Куваркан чом дорö, öзтiсны изъя чом гөгöр ыджыд би, палитчы пö пез Куваркан, а сійö радысла чеччалö, важөн пö нин эг шонавлы, нэмөн эг пывсьывлы, бура пö и пöсьöдча, лы-сьöмöс небзьöда. Сэсся мöдiсны коявны доналöм изъяс вылö ва, пусьы Куваркан, помöдз небзьöд лы-сьöмтö. А Куварканлы нöшта на нимкодь, некор на пö эг мысьывлы. Кыскисны Куварканöс чомсьыс да кок улын таялісны. Ланьтiс Куваркан. Шыбитiсны понъяслы ныр улас, но некутшöм пон оз исышт сійöс. Видзöдöны, асывнас Куваркан бара кравзö изъя чом вылын, ок, пö чöскыда и узьсьöма.

\*Сöза — небыд, вема.

Сэки петіс йёз водзё Яб Калялөн медічот пиыс сё арёса Юсь старик:

— Ас пытшканым, асланым сьёлёмъясё поздысьома, муса войтыр, Лёклуныс. Но кыдзи сыысь мездысьны, некод оз тёд. Мёвпаліс сы йылысь менам бать Яб Каля. И ме со дзормытёдз жуглі юрёс и немтор эз сюр. Уна во сайын ыстылім Тури нукёс ылыс муясё, медым вайис тундраё сійё лекарствосё, коді эськё Лёклунысь бурдодіс йёзёс. Кула кё ме сы вотёдз, йёз, энё вунёдой корны сійё лекарствосё.

Коркё и бергёдчис тундраё Тури, эз нин су ловійон Юсь дедсё. Кутшом зеляя пё вайин, Тури, юасисны йёз. Абу пё сэтшом зеляяыс некөн, аслыным пё колё мездысьны Лёклунысыс. Кыдзи пё? Зэв прёстё пё. Ті пё өні быдөн торійон пестаныд ассыныд пёрт увнытё, а колё пё тёждысьны и ёртыд вёсна, ыджыд шудсё пё колё пестыны өтвылысь.

Чукөртчисны сё чомъя өти мыльк вылё, начкисны, гашкё, тысяча көр, сёйёны-юёны, сьылёны-йёктёны, өтув көръясёс дөзьөрйтёны. Видзөдө Куваркан шуда йёз вылё и сьёлёмсё курыд шог йирё, нинөм, некутшом лёктор некодлы оз вермы вёчны. Видзөдіс-видзөдіс да вир синваён бёрддзис, мыйла пё и олі тайё свет вылас, гаж пё эг тёдлы, ни бур ёрт эг лёсьөдлы. Бөрдө Куваркан лун и вой, дугдыны оз вермы. Шорён визувтё синваыс из чомсянь. Со пё мамөлөн кывъясыс и збыльмисны, думыштіс медбөръя здукас Куваркан да пөльыштіс пез ловсё. Воис кыськё төвныр да качөдіс енэжө Куварканлысь шойсө: шаньмөм тувсовъя шуда му эз көсіы босьтны сылысь сьөд шойсө аслас мича веж морёс вылас. Пөрис Куваркан букыш сьөд кымөрө. Бөрдө Куваркан, му вылё зэр тусьяс усялөны, скөралё тундра пасьята, турөб гартө. Но сьлөн дурөмыс оз мөрччы тундра-матыыслы, сійё водзё шаньмө да мичаммө.

— Мамко, тэ век меным тайё мойдсө мойд,— кывлысис дадь бөжын Митрук,— сэтшөма шонала кывзігөн.



ор Митруклөн бөр воссисны синъясыс, тундраыс эз нин вөв дзирдалысь вата кодь. И некод нин сьод очки эз новлы. Тундра тувсовъя байдөгъяс моз серөссьома. Мылькъяс кушось, молля лым-йыс сөмын гөптовъясын көтасьом сов рөма, босьтан вомад да йи моз сярakilö пинь улад. Кызвын мылькйыс паськыд эрд вылас торъяось на, быттьө тупөсьяс еджыд рач вылын пөжасьоны, но өткымынъяс нин йитчөмаось векныдик сьод лантаөн, киасьоны өта-мөдныскөд, радось жө тулыслы. Лунысь-лун унджык сьод муыс мыччысьө, регыд өния куим көр пыддыс нель-ө-витөс кутасны лямкаавны дадюлас, куш му кузяыд өд сьөкыдырысь дзуркйөдлө дадь суйыд.

Батыс Митрукөс дадь бөжас оз босьт, лишнөй груз пө. Пиөдчан кад, чужоны стадаын көрпиян. Батыс уна ветлөдлө, дадюлыс ёна мудзө, тулыснад быкъясыс эбөстөмөсь. Регыд петас веж турун, сэки көръяс здукөн вынсяласны свежөй сёян вылас. Сэки Митрук бара кутас дөввидзны батыс дадь бокин. А өни сийө чом дорын ноксьө.

Медым весьшөрө не воштыны кадсө, Митрук ас водзас пунктис мог, лючки велөдчыны пастук уджө, школаас мунас да некор лоө. Медводз пастуклы колө лючки шыблавны няртала, стадаысь дадювса көръясөс либө бокөвөй стадаысь ассьыд ылалөм көрөс кутавны. Нярталаөн кө он сяммы вөдитчыны — сийө джын пастук на.

Митрук оз нин первой лун лөсьөдчы нярталаөн. Нярталасө кыөма ён көр кучикысь. Кусө первой шоммөдөны, медым гөныс усис, а сэсся сэтысь шөралөны кузь-кузь прать, кусө дзоньнас. Кучик пратьсө зэлөдөны, медым кыөм бөрас эз нин нюжав. Нярталасө кыөны нель пратьысь, вьльнас ачыс нель рөча и эм, видзигас гөгрөсмө. Митруклөн нярталаыс важ, ёна нин гөгрөс-мөма-шылялөма. Пастукъяс оз нин вөдитчыны сийөн, сисьмыш-төма да пратьясыс оръясьоны. Дерт, Митруклөн, ичөт эбөса

мортлөн, некыті оз ор. Сэсса өд ичөт пастук оз ловъя көръясөс, а өти местаын сулалысь ёсь дадь нырсө «куталө» няртала кытшнас. Первой ылісянь матыстчө аслас «прөмыс» дінө уйөмөн, кор нин матын лоө, звирк чеччө да равөстөмөн уськөдчө водзлань, сійө жө здукас шыбитө веськыд киас водзвыв дасөтөм кытшсө. Равзөмсыйс эськөн мамыс вомалө и понъясыс увтчөны, но быть горөд, өд колө чуйдны кутантортө, котөртысь көрыдлы ёна сьөкыдджык песькыльтчыны шеновтөм кытшсыс. Стөча шыбитөмыд джын делө на, колө на здукөн шыркнитны кытшсө, Митрук бөрлань песовтчигмоз некымынысь бергөдчө кок пөв йылас (сідзи өдйөджык бергавсьө), нярталасыс, дерт, гартчө ас гөгөрыс. Медбөрын детинка брун өшиө зэлаалөм няртала вылас (абу өд сійө помтөм). Со и сюри! Колө шуны, Митрук корсюрө джөмдалө да усялө, этша өмөй быдсяма вутш юрыс, но здукөн чеччө, медым некод эз аддзвыв, да зільджыка нин песовтчө. Митруклөн горзөмсыйс заводитө доймыны горшыс. Ланьтө. Горзытөгыд нинөмла и кыйөдчынысө. Митрук өні бергалө кок пөв йылас. Шылыыд местаө веськаліс да ньөти оз тутав, дурпоп моз шаркйө-бергалө. Зэв любө Митруклы бергавнысө. Сэсса нимкодьлуныс тшөтш шымыртө дзоньнас тундрасө и еджыд сямөд чомнысө, радысла төкөтбө оз йөктыны найө. Гажалө тундраыс, тшөтш заводитө бергавны, а Митруклы сьөлөм вылас деливө лоө. Уйө чом дорө.

— Мамко, кут көть чомсө! Бергалө тай.

— Бласлө кристос, код көн бергалө? Мый нө, пиө, бауасьөмөн ветлан?

— Дурмөма тай, — шуис Марина чойыс.

— Коді? Ме дурми! Сувта кө — петкөдла гаж.

— Сійө, пиө, юрид бергалө тэнад, а оз чомным, — шуис мамыс. — Кутчысь му бердас да куйлышт. Прөйдитас.

И збыль, регыд бара ставыс крепыда сувтіс аслас местаө.

Куйліс Митрук шонавны заводитөм вутшьюр бокин да мөвпаліс, мый водзө вөчны. Со чомйысь петіс Марина чойыс, кык во сайын нин сійө помаліс дас класс, ныртчө думнас институтө, ветлас кытчөкө да бөр локтө, пырнысө ли мый ли оз

вермы. А Митрук эськөн эз сы моз падмы, медся дзескыдінас йөршитчис. Чомйын Маринаос невестаон ыдждөдлөны, быттьо ошкөны, оз велөдчы да. А жөникыс абу тани, мөд стадаын. Чойыс прөстасьыс скөралө Митрук вылө, сідз прөстасьыс нетшыштө пельөдыс, кыті медся доймө. Митрук сөмын чарөстөмнас мездьсө. «Но и горш тэнад, Митрей-хитрей», — быттьо кодлыкө норасьө чойыс да энотчө сылөн пель дінысь.

Митруклы өні окота лои босьтны водзөс чойыслысь, да и колө жө кутшөмкө ловъяторлы вувзьевлыны нярталасө. Көрьясөс кутны Митрей оз на вермы, найө вынаөсь, пышйөдасны нярталасө. А Марина со дзик сырича\* моз кыйкьялігтыр небыда тувчалө. Öвтыштис Митрук нярталанас и стөч чойыслы голяс веськаліс кытшыс, Марина төкөттьө кок йывсьыс эз пөр.

— Дурак! — Марина уськөдчис вокыс вылө. — Пельястө орөда!

Но Митруклы тайө пөрийө удайтчис пышйыны. Кор чойыс лөныштис, Митрук лебезитөм ради шыасис:

— А ме төда кытысь кодзувьясыс.

— Кодзувьяс вылө нин видзөдан, — даддын гудйысигмоз шыасис Марина. — Водз тай!

— Мыйла водз? — эз гөгөрво Митрук.

— Кодзувьяс йылысь сёрнитөны сөмын жөникасигөн, а тэнад ныр улад зырымыд на косьмытөм, — скөра шуис чойыс.

— Ме... ме... — немөй моз броткис Митрук, сійөс скөнө скөрмөдіс чойыс. — Тэнад, тэнад аслад пустөй юрад куш жөник поздысьөма...

— А тэныд нө завидь?.. Тэ, гашкө, гөтрасьны жө нин көсьян да? — нерыштө чойыс.

— Ме... мө... мө... — Митрук уськөдчө му вылө кымыньөн да заведнөысла мөдө чужьясьны, кынь моз никөставлыны.

Марина лукысьыштис даддын да пыртис чомйө джынвийө нин вурөм малича, асьыс приданнойсө. Кольөм арсянь

\* Сырича — пиявтөм на важенка.

нин мамыскөд ноксьоны сы дінын. Төдөмысь, ок, и мича лоо! Батысь шуо, сэтшөмөс пө вурөй, медем жөникыс видзөдліс да синмыс чегис, кыз тай водз тулыснас Митруклөн тундра мичсьыс. Жөникыс Мариналөн Ласей, армияө ветлөм том морт. Унаысь нин воліс Ласей на чомйө, ёна сывны да йөктыны радейтө. Нярталанас стада костсьыс любөй көрөс здукөн тшапкас. Дадюлыс ок тэрыб, Митрук өтчыд пуксьыліс Ласейлы дадь бөжас да сьөлөмыс төкөтө вом пырыс эз пет, сэтшөма чеччөдлө гөптайнъястыыс. Төдөмысь, бригадирөн жө лоо, вина юны кө оз велав кадсьыс водз.

Митруклы, дерт, Ласейөдз ылын на, но и сійө чом боксө сісьтыны оз кут. Пуксис Митрук дадь вылө, ньөжйө төбъяліс киас нярталасө, мөвпаліс, кутшөм задача ас водзас сувтөдны. Өнөдз Митрук нярталасө век на шыблаліс веськыда, либө неуна увлань. Пастукудылы тшөкыда ковмылө вувзыны вывлань, шуам, көрыс лөня йирсьө мыльк вылын, кыйөдчыны колө мыльк горувтіыс да няр тала кытшсө шеныштны вывлань, көрыс повзьөмвывсьыс кыккокийыв чепөсйө. Вөліны кө вөрын, кызди төвнас, Митрук эськө пу чальяссө куталіс. А тані ставыс шылыд да ляпкыд, леторосыс и то гөптын быдмө, ни өти пу мыльк вылө оз вужьясь. Усис видзөдласыс асланыс ёсь юра сямөд чом вылө. Митрук вильшасигмоз кавшасьлывлө чом вылас, көть сямөдысь, а крепыд да исковтөдө бура. Дерт, таысь оз ошкыны, пель дорсьыс небыд юрсисө нетшкөны, но луннад өтчыдтө кавшасьлыны позьө. Колө шуны, сямөд чомйыс снитки на выль, өти гожөм на и видзисны. Төвнас көр куысь вурөм нюкъясөн олөны, сямөдыс көдзыднас өд рөшкыд, потласяс. Чом вылас налөн өні шлапкөма квайт ёдум, либө квайт ыджыд сямөд пласт, улиас нель пласт да выліас кык. Митрук лючки помнитө, кызди вурисны ёдумъяссө. Первой додь тыр кулисны сямөд, сэсся сійөс пуисны ыджыд пөртйын, небзьөдісны. Сэсся өтар боксө, сьөмөсладорсө вуштисны пуртөн. Сэсся куим пөвсталісны да сиралөм гезйөн и вурисны сямөд пластъяссө. Ёна ошкөны чомнысө, брезент серти пө ёна кокни, а зэрыс ньөти оз йидж, көть и кылан сылысь сярөд-

чөмсө. Чөмсө разясны да ёдумъяссө трубкаё гаровтöны. Митрук горзывлө трубка пырыс, зэв гораа артмө, и сыысь некод оз вомавлы, көть поттөдзыс чарзас. Чом йылас ёсь йыла ывъяс чурвидзöны, быттьö көр сюръяс. Ывъяс костас меститчöма съод көрт труба, кытысь öнi тшын сора би пуркйис, кос роскөн ломтысьöны. Зэв яра ыпъялө, но Митрук биа трубасö быттьö эз и казаяв, сийöс здукөн шымыртис виччысьтöм мөвп: со кытчö колö шыблавны нярталасö, чом юрас, ыв помъяссö кутавны! Найö öд дзик чалья сюръяс моз чашнитчöмаёсь.

Митрук лэччис шор гуранö, чомныс шор бокрын сулалис, тэрмасьтөг төбъялис нярталасö. Му бердас ляскысьöмөн, медым чомйыс пöрасыс водз эз чепöсийы местасыс, шыр моз кыссис-уйис. Чужöмсö парсышталисны кос керчьяс, чамгис нырас ыркыд ульöс дук, мый вынсыс кутчысис несйöдöмысь. Со и мыльк вылас нин. Звирк чеччис, турыштчис водзлань, равöстис да вувзис нярталасö. Лючки кытшыс паськалис чом весьтас. Оз мын öнi. Митрук бөрлань сетчöмөн бергалігмоз элöдiс гөрөдсö. Кылө мыйкө брун усис, бус лыбис, вөлөмкө, трубасö кутöма. Со усис тшытшьяса трубаыс, быттьö тулысын көрлөн важмөм сюрис. Чом юрöдыс съод тшын пуркйö, сэсса би ыпнитис. Чом пытшкын кылө кодъяскö полошуйтчöны. Первойөн чомысь бырс-петис Марина чойыс, приданной маличасö моздорас кутö.

— Со кодi поджигательыс!— уськөдчис чойыс Митрук вылө, нжөдчис пель дiнас, но зонка эз сетчы, котöртис шорлань.

— Сюрлы, сös поджигатель!— грöзитчис Марина.

Регыд ставөн кодзувкотьяс моз жөдзны кутисны чом дорын.

— Öзийим! Сотчам!

Здукөн эськө и разисны чөмсö, но век жö кык вылыс ёдумсö кусöдны эз удитны. Окайтисны да акайтисны да сэсса чөмсö выльысь керисны. Митрук ставсö тайö видзöдiс вутшьюр сайö дзевсьöмөн. Детинка лыддис асьсö мыжаөн и окота вöли мый-

өнкө отсавны чомдорсаяслы, но эз лысыт матыстчыны скөрмөм йөз динө. Сэссия джынъя чом дорө воалісны дадюлаяс, тайө стадаысь пастукъяс. Медводзын айыс дадювсө домис.

— Чомсө ли мый разны көсийөны, — шуис аслысмоз, сэссия казяліс да горөдіс, — пөжар тай вөлөма! Некод көть эз сотчы? Көн нө менам Митрук пиыс?

— Тани ме! — чеччис Митрук вутшьюр сайысь.

— Мый керан сэтөнсө?

— Дзедься, пөжар кери да.

Батьыс здук кежлө быттьө кынмыліс места вылас, сэссия тэрыба пырис чомийө. Кор и мукөдыс пырисны, Митрук кок чунь йылас матыстчыс чом бокө. Джынъя чомсьыс став сёрни-ыс лючки кыліс.

— Чомным югдіс, өшинясим, — шмонитіс Ласей дядьыс.

— Зэрыс вылысаным воны кутас и, — вочавидзис кодкө.

— Таысь бур страк колө сетны, — чай юигмоз сёрнитіс батьыс. — Кыдзи нө тадз челядьөс биөн ворсны лэдзанныд, — пиняліс Митруклысь мамсө тшөтш.

— Няртала висьөм тай босьтөма. Пастукөн көсийө лоны. Кыдз нө жө бара челядьөс ворсөмысь өтарни кутны верман, — мамыс быттьө и дорйыштө сійөс.

— Мыйта рөбөта воши, — тыдалө вокас, нянь някляліс Марина.

— Ок, ёна и лачка сөтанаөс! — көсийысис батьыс.

Митруклы быттьө кодкө ёсь емъяс сатшкаліс мышкуас и улөджык. Но эз вөв лөгалөм бать вылас, збыль өд мыжа. Кутшөм лектор вөчис! Сы вөсна ставөн зэр улын кутасны гегдыны. «Мед лачкас кө, — решитіс Митрук. — Ог мөд пышь-явны». Зонкалөн первой вөлі дум дзедьсыны сук рас пытшкө.

Митрукөс некор на эз тасмаавлыны, и сійө зэв ёна поліс татшөмторсьыд. Но век жө юрсө өшөдөмөн суд вылө моз воськовтіс чом пытшкө.

— Пуксьы пызан саяс, пиө, — корис батьыс, — ю чайсө. Эштам да бекьястө шонтышта. Лөсьөдчы.

Митрук кызмырдөн юис өти стөкан чай да бара петіс

чомыйсь. Бовъялыштіс дадыс кості, нёрвчис чукиён сөвтём сябуча\* дорё. Сябуча вылас, гөннас вылө, шлапкөма көр воль. Воль пырыс зэрыс оз пыр, но дыр каднас сійө зэв ёна нин быгалөма и гёныс лестукъясөн кульсьө. Митрук гылөдыштіс гёнсө да пуксис сы вылө, шоныд и небыд. «Көръясыдлы, көнкө, ньөти оз и мөрччы лачкөмыс татшөм сук гён пырыс,— завидьпырысь думыштіс Митрук.— Оз прөста найө чужны гөна пасьөн». А Митрук дзик няр, черияслөн весиг сьөмтор вылысаньс эмьшт, а сьлөн куш доймысь вир-яйыс, кодлы окота сійө и чепөльт. Сідзисө эськө маличаа и дөрөм-гача. Но мый төлкыс, сійөс кө позьө пөрччыны. И сэк жө юрас вирдыштіс колана мөвп. А клеитны кө сук гёнсө яй вылас? Митрук сюрөм мөвп дінас кутчысис, кызди ваө вөйысь нюжөдөм бөдь дінө. Клейыс регыд сюрис, айыс неважөн клеитавліс кысөн выль лызьяс да кольыштөма көр сюръясысь пуөм клейыс. Митрук лэдзис гачсө да сук пластьясөн гёнсьөдіс асьыс пукаланінсө. Сэсся кынөм вылас водіс айыс додь вылө, лэдзис гачсө. Митрук весиг эз кыв ыркыд төврусө.

Петалисны чомыйсь, батыс пөрччис паськыд тасмасө да матыстчис дадь вылын куйлысь Митруклань. Митрук эз повзыь, сійө ас кежсьыс шпынн्याліс. Батыс өвтыштіс тасманас, но сынөдас кынмис кийс:

— Чу! Митрей, гөнсялөмыд тай коркө кості! Видзөдлөй, мый миян пиыскөд лоөма.

Ставөн чукөртчисны дадь дорё.

— Көрө тай пөрөма! Кусө кульны колө,— серөктіс кодкө.

— Поджигательыс клейсө мыйта торкөма,— шуис Марина чойыс.

— Көть пөжарник, а юр вемыс рөбитө,— шуис ньөжмыд Лөбей.— Öні тасмаалан кө, зараженньө вермас лоны.

— Ойя да ойя, кызди нө ме тэнө мыська таысь,— шогсис мамыс.

---

\*Сябуча — додь, көні новлөдлөны кос паськөм.

Митрук висьсь морт моз нюжвидзис дадь вылын да пыдисянь ышлолаліс. Бригадаса войтыр шуалісны ёсь кывъяс да гизисны, быттьо и вунөдісны сотчөм чом йывсьыс.

— Чечы дадь вывсьыс, — медбөрын небыдика кинас шлопнитіс Митруклы батыс. — Гөннас тыртін.

Детинка ньөжйө лэптис гачсө, мамыслыс корис съод майтөг кусөк да лэчис шор дорө.

## МИТРУК ШЕДИС ЛЭЧКӨ



эссия ветлісны кутшөмкө ылыс сиктө да вайисны брезент. Чом юрыс өні брезентысь, а улысыс сямөдысь, тувсовъя байдөг кодь жө сера чомныс. Гашкө, та вөсна и тулысбыд чом дорас коткисны ай байдөгъяс.

Но тулыс тэрмасьөмөн пышйис кытчөкө, Митрук удитіс кыйны сөмын некымын байдөгөс. Кор тундраыс серөссьө, кушалөны лымйысь мылькъяс, ай байдөгъяс ёна радейтөны кушинъяссө, еджыда дөввидзөны съод мыльк вылас, сера сьылінаныс гоньялөны, ещө и броткөны кодкө вылө. Митрук казялас чуксасьысь байдөгсө да пыр жө лымйысь чучела мыльк вылас вөтчас, дорас сімөм капкантор октас, весиг оз вевттыы. Йөй байдөгьд сэтчө и пырө, броткө-жөдзө чучела дінас, кучкалө борднас. А чучелаыд, дерт, оз вөрзбы местасьыс, ни немтор оз шу, абу ловъя да. Тайө и скөрмөдө байдөгөс.

Сэссия дзикөдз лым сьлөм бөрын и байдөгъяс кытчөкө дзесисны. И Митрук регьд на йылысь вунөдіс, быд лун вөрзөны йиа морелань, вөтөдысь ном-гебйысь пышйөны. Көръяс оз радейтны найөс, да и мортыслы абу любө, сымда лоө да гоґшад быдсөн пырө, он нин шу чужөмтө и китө вильөдөм йылысь. Кор абу туйынөсь, и ывлаыс дзурс лөнь, Митрук кымыньон куйлө дадь вылас либө васөд малича пытшкө нырсө суйө. «Тундраын мыйта номйыс, буракө, некөн жө нин абу», —

шуоны гырысьяс. Быд лун пышйоны, а номйыс быттьо наысь на тэрыбджык. Збыль вылассо шоныдыс коклябёраныс тувчаліс, ассыс пай йиа саридзлань жё нюждөчө.

Митруклөн олөмыс, кызди чайтсис аслыс, регид ладыв пуксис, некутшөм мисьтөм ним чом сотөмысь эз көвьясь. Колө шуны, ним сетөмнас чомсаяс эз пасө веськавны. Збыль өд, поджигательнас радио пыр шуоны война өзтысьясөс, а оз чом сотысьясөс.

Но Митрук тані ылалыштис, чомсаяс ас кадө та йылысь казтыштисны на.

Уна сикас шор вуджисны, додьяс пөрласьоны. Додь пөригас быдөн горзө, коді аддзө додь пөрөмсө, медым нуөдысьыс сувтөдіс даджвсө. Пөригас доддыс вермас киссьыны, разьясны көртөдьясыс да, либө жугавны, мый медся лёк. Од тундра шөрын пуяс оз быдмыны, дзоньтасыны нинөмөн. Көть додьяс пөрласисны (сытөг оз овлы), но некодлөн эз пазав, сы вөсна мый ставөн ёна горзисны. Море ю бөрын (кос көлуя додьяссө пыжөн вуджөдісны, көрьяс асьныс уйисны) веськалісны тшем мылькьяинө, Лөмөн шусьө. Со көні додьясыд пөрласисны! Митруклөн горзөмсьыс непөштө горшыс, кынөмыс доймыны кугіс.

— Кынөмам горзөмыс лэччис, — норасис Митрук мамыслы.

— Гачтө көть эн тшыкөд. Эн сэсся өтарни лёкысь горзы, — велөдіс мамыс.

— Пельтөмөсь кө аргыш нуөдысьясыс. Маринаыс медся нин сьөкыд пеля, — Митрук эз на вунөд чойыслысь «поджигательөн» нимтөмсө.

— Эн сідз чойыд йылысь сёрнит, абу сьөкыд пеля, прөстө аслас думьясөн ылавлө.

— Невеста да сійөн...

Мамыс тайө сёрнисө водзө эз нуөд.

Сэсся коркө вуджисны Көрөтайка ю. Пыжөн жө ноксисны. Тайө пө медбөрья ю нин гожьянінө вотөдз. Көрөтайка саяс бара на зыбуч нюрьяс гөгрөдісны. И став нокыс номьяс

вöсна. Кутшöмкö ичöт номъясысь, кодъясöс печикнад позьö  
вины, кöр видзсысяс горзигтыр усйысьöны йиа саридз дорö.

Со водзныраныс, веськыдланьыс мыччысисны Урал-излөн  
нюжвидзсысь дзормöм мышъясыс. Да и төвруыс лои ыркыд-  
джык.

Стöч гожсяинö воигөн тшöкыда кутисны сёрнитны Амдер-  
ма кар йылысь. Быд во сэтчö кöр видзсысяс лэччылöны сёян-  
юанла. Карыс изья мусюръяс горулас, дзик саридз бердас.  
Митруклы кажитчö оз кынöм вöснаыс найö тöждысьны, а ён-  
джыкасö гаж корсьöны. Сёяныс пызан выв тыр. Митрукöс ни  
ötчыдысь на эз босьтлыны сийö туяс, ичöт на пö. Öнi тадзисö  
оз нин лысьтны шуны, лючки велалис шыблавны няртала, ков-  
мас кö, вермö веськöдлыны рам кöръяса дадюлөн, регыд öд  
кöкъямыс арöса лоö. Сэтшöм окота Митруклы видзöдлыны  
карсö! Да и нöшта нин кор сэтшöм матын сийö... Сиктъяссö  
Митрук лючки нин тöдö, ставыс кызвыннас öткодьöсь: пу  
керка, стеклöа öшиньяс, керка мышкас — карта, мöс сэн бак-  
сö, ыжъяс нерсьöны, карта бöрас куйöд мыльк, Митрук сэты-  
сянь лыжиён иславлис. А карас нинöм сэтшöмыс абу, весиг пö  
керкаяссö тэчöны изйысь. Пачьяс оз ломтыны, а шоныд. Васö  
оз чомсаяс моз ведраысь бучкыны, а кутшöмкö кран помысь  
босьтöны. Зэв интереснö!

Öтчыд асья пызан сайын бара лыбис сёрни дадюла кокөн  
карö ветлöм йылысь, Митрук збоя лэптис юрсö:

— Ме сэн карас став крансö косöдз някала!

Ставөн гылыда серöктисны, но батыс эз нюмтёвт весиг,  
сыла тшыгöрыс кынмис вом дорас:

— Тэ, братан, неважөн на ыджыда мыжмылин. Кар йыв-  
сыс вунöдлы таво кежлö.

Митрук кельдöдис, сэсся гöрдöдис. Бусколы шыбитис  
вомсыс яй торсö, тшапкис няр маличасö да петис ывлаö.  
Сийö немтор лючки эз вежöрт. Кыдзи укшаль поводдя дырийи  
руасьö тундраыс, сідзи жö гудыртчис юр вемыс. Öтитор сылы  
вöли гöгöрвоана: кор батыс кодöскö шуö «братанён», сылы

бур вылө надейтчыны оз ков. Митрук бергаліс чом гөгөр, чужьяліс вежөдысь вутшъяурьяссө, чирсийс сиравлөм гөна төбөкна-нас чорыд керчь. Эз кө сэки мудерит да батысь лачкис чом сотөмысь, гашкө, и прөститіс, эз потш өні карө муна туйсө. Но киссьөм ватө тай он нин бөр курышт...

Лун-мөд Митрук гусьөн нөрпаліс, а сэсся чужтавны кутіс өти бөрся мөдөс виль планьяс, кодьяс быть тшөктасны вежны батыслысь думьяссө. Митрук чайтіс крепыда кутчысьны батыслөн дадь көрталан гезіө. Но өд батысь Митрукысь уна пөв вына и, дерт жө, кокниа нетшыштас. Медбөрын, шуис велөдчыны тэрыба котравны, кызди көрьяс либө поньяс. Көть и йөткыштас батысь дадь боксьыс, Митрук сэки кутас вөтчыны бөрсыйс. Коркө жалысь петө да батысь лэдзас жө дадь бөжас.

Тайө планыс Митруклы кажитчис медся туянаөн. Митрук стада пытшкын вөтлысис теляс бөрся, ачыс на моз жө рукөстлывліс, медым эз зэв тэрыба вөрөдны кузь кокьяснысө, а то сійө пыр и воштө син увсьыс бөрийөм телясө. Пастукьяслы эз кажитчы көрьясөс чуйдалөмыс, такөдісны, эн вөрөд стадасө, мед лючки сөйөны, тэ пө өд абу урөс пон. Та бөрын Митрук мөдіс котравны чом гөгөр. Бара дөзмисны йөзыс, полөны чомыйсь петны, детинка оз и казьявлы, кызди зургө чом пытшкысь нель кокасьөмөн петысь мортөс, кодлы синмас кок нырнас чуткас, кодлысь нырсө пескыльтас, көть небыд гөна төбөкыс Митруклөн, но өд вывсьыс дойдө. Өтчыд Марина чойыс тазійөн поньяслы сөян петкөдіс, Митрук кисьтіс тазсө. Та бөрын ачыс дыр котраліс Марина чойсьыс. Сэсся Митрук дадьяс костөд поньяс бөрся кутіс вөтлысьны. Никсөны коньөр кычаньяс, увтөны гырысь поньяс, оз кажитчы детинкалөн бушуйтчөмыс. Шензьөны и пастукьяс, мыйся висьөм пө зонкасө тшапкөма, ветеринарнөй «ратшыс» пө волас да мыччөдлам.

— Тая тай менам пиыс войлысьөн көсийө лоны, — вежөртіс мамыс. — Кызди асланым деревняным Тим Коль. Сійө тай сюра-тошка мужик, войлө и войлө. Кодөс вөтөдө? Пөшти некытөн оз рөбит. Районын войлө, көнкө мөдлаын войлө. Водзө оз жө пет, а мый пустөй войлөмсьыс. Чөвт, дона пи,

войлөмтө, эн хөдтө песты, сэссия бөрыннас ачыл он ло рад.

— Дик спортсмен бара кыскө усис, — суйсис Марина чойыс. — Став понсө кок йывсьыс ускөдiс, косьмыны кутiсны поньясыс.

— Спорсьменыдлы нинөм и төлксьыс, кокыс кө тэрыб и.

— Тим Кольыс сийө профсоюзной деньгасө збыль бура войлөдлө, — кывкөрталiс дөзмөдан сёрнисө батыыс. — Абу на йой.

Митрукөс чепльөдлiсны янөдана кывьясыс, но котралөмысь эз орөдчы.

И со матыстчис сийө луныс, асывводз бөрийсны стадаысь збой көрьясөс. Ок, туйыс кузь лоө! Лямкаасисны да пырисны чомийө чай юны, Митрук здук жежлө оз вешийв батыыс дадь дорысь, полө кольөмысь.

Со и батыыс босьтiс киас хорейсө, вөжжисө дадь суюсьыс мөдiс разьны. Тайө здуксө Митрук кыйөдiс, кань моз звирк чеччыштiс дадь бөжас да крепыда кутчысис дадь көртөдьясас.

— Тэ кытчө?

— Ме тшөтш сэтчө... Ме быдми нин, нульысь нин арлыд-нам вуджи.

— Лэччы, пиө, лэччы, — кыскис малича мышкөдыс мамыс. — Туйыс кузь. Ывлаө вой улө веськалан, зэр суас. Карас, грек вылө, вошан уна керка костас!

Митрук төдiс, тайө сөмын на заводитчөмыс, медыждыд веныс водзын на, батыыскөд. Дадюла неуна и войөдыштiс, Митрук мач моз лэбыштiс дадь вывьсыс: батыыс дадювсө сувтөдлытөг өг моз и чишкыштiс сийөс. Но мед! Митрук эз прөста котрав сы мында: юр пырыс перийс маличасө, лэптiс усьөм төбөксө да пызийыны-котөртны мөдiс дадюла бөрся. Батыыс оз и видзөдлы бөрас, шенасьө сөмын хорейнас. Со нин чомийыс син увсьыс вошны кутiс, а батыыс абу и өна ылын, мудзасны кө көрьясыс, эськөн и сүөдас, но Митрук абу жө мудзтөм, содтөд киас бовьялө гожся маличаыс. Сийө эськө и кокныдик, но век жө торкө өдсө. Со и чомийыс енэжтасас пырис. Öнi көть мый, а оз позь кольччыны дадюласьыс. Ылав-

ны вермас. И дзик тайё здукас Митрук мөдiс кольны дадюв-  
сьыс. «Гашкө, горөдны батысө?» Но батыс вылө горшас  
сатшасьөм дой эз лэдз шысө. Батыс коркө ачыс бергөдчыліс  
мышкас. Сувтөдiс дадювсө.

— Тэрыб кокыд, пиө. Татшөм кө эськөн юр вежөрыд лоас.  
Пуксьы. Верман ачыд дадь вылас кайны. Веж быгъя өд рожаыд!

Митрук кымыньөн водiс дадь вылас, чышкаліс чужөмсө  
небыд көр воль бердө. Сэтшөма мудзсьөма, көть муас пырас  
сьөкыдысла. Эз на удит лючки руавны мудзыс, мыйлакө дадю-  
лыс бара сувтiс. Восьтiс синьяссө да шогысла көть бөр куняс,  
бөр асланыс чом дорө воөмаөсь.

— Маличатө, пиө, колө вежны, нярнас кынман войнас,  
гашкө, көдзыд лоө да.

Митрук төвся маличаасис, а батыс тшапкис мөздорас да  
тыртөм додь вылө шлапкис. Митрук эськөн мый вермис водз-  
сасис жө, но весьшөрө. Ок, крепыда көртавлiс дадь бердас  
батыс.

— Шойччышт, пиө, сийө өнi тэнад пөльза вылө мунас, —  
шуис батыс да войөдiс сийө гажа карас, көнi думьас Митрук  
олiс лун и вой.

Митрук пеласис, көть төдiс — весьшөрө. Мыйкө зэв  
мичатор энөвтiс сийөс, ыджыд көсийөм кусiс сьөлөмсьыс. Бур-  
кө, сэсся сийө некор нин оз аддзыв карсө ни саридзсө. Йөртас-  
ны интернатө, кутас велөдчыны, овны сук вөр пытшкын. И мый  
сэтысь аддзылан? Митруклөн гырысьджык чой-вокыс олөны  
школа-интернатас, тундраас оз волены и гожөм кежлас, пио-  
нерлагерө ветлөны да ещө кытчөкө. Төдөмысь, и Митрук ыла-  
лас сийө олөмас. Но аддзывлытөм карыс да морөыс некор оз  
вунны. Сир гөгыль моз ляскысисны сьөлөм бердас да кутасны  
висьөдны ловсө. Өд шудыс вөлі сэтшөм матын! Митрук лөга-  
ліс ас вылас и өттшөтш ставыс вылө.

Рыгьядорыс Митрукөс лэдзисны дом йывсьыс, чайтiсны,  
раммөм зверыс оз нин сэсся пышыы. Митруклы ныр улас пук-  
тiсны пу тасьтiөн пөсь шыд. Көть кынөмыс сямалiс, сөйны  
эз кут, кымыньтiс муас.

Митрук ньөжйö ылыстчис чом дорысь, тундраö дзебсян дум эз кут, но йöз костас сылы эз вöв око́та бергавны. Митрук-öс здукöн дзебис йöз син водзысь сера тундраыс. Сийö куйлис вежöдöм керчь вылын, кыскис пытшкас васöд ыркыд русö. Митрук кылис мамыслысь и чойыслысь чуксалöмсö, аддзис йыла чом юрсö, но эз шыась, сылы вöли веськодь налөн шызьöмыс. Мед эз домавны, мед эз пöдтыны сылысь мича көсийöмъ-яссö!

Митрук эз и казавлы, кыдзи сийöс көдзыд му бердас личкис чорыд ун. Садьмис асьядорыс, стöчджыка кө — сийöс вöрöдiс кок пöлöдыс Лöбей, стадаысь вöлöм локтö да вылысас веськалöма.

— Тэнö öд быдлаысь нин корсьöны! Мый нö керан!

Лöбей кыпöдiс детинкаöс аслас дадь вылö да нуöдiс чом дорö. Митрук быттьö век на эз садьмы, турдöма ки-ко́кыс, оз нюклясь коскыс, потiс-висис юрыс.

— Кыскöма тай муыс, дзоля пиöс! — горöдiс мамыс. Мый кыскöма Митруклысь муыс, сийö лючки эз тöд, буракö, шоныдсö, сийöс кутiс тiрзьöдны йирмög. Көть детинкаöс ёна тубралiсны, и чомъяс ломтысис көрт пач, йирмögыс эз прöйдит. Сёяныс эз пыр вомас, тшöкыда вукöдiс. Чомйын вöли ставөн шöйöвошöмаöсь, виччысисны батьсö, мый шуас бригадир. Сöмын Лöбей быд ветлöмö стадаысь вайлис важенка йöв, кодi вöли нök кодь сук. Митрук ёна радейтö көр йöвсö, но и сийö öнi эз кылав. Батьыс воис кык лун мысти, норасис жö юр висьöм вылö, но нюжмасьны эз кут, пыр жö лямкаалис виль палейясöс да лэччöдiс Митрукöс моребердса посёлокö, эз карас, кытчö ачыс ветлис, сийö пö зэв ылын.

Янгере́й, кыдзи шуисны сиктсö, вöли төвъя́нинö бергöдчанинын. Дерт, сэтысь кокниджык бөр катны Митрукöс чомйö, кор бурдас больничас.

Батьыс туй чöжыс олис чöv, гашкö, кылис жö асьсö мыжаöн. Асьыс пай и Митрук эз сёрнит. Сöмын öтчыд шыасьлис:

— Айко, тэ кулан да мыйöн лоан?

Батыс та вылө дыр эз вочавидз, сөмын косіника кызөк-  
тивліс, быттө чери лы горшас сатшөма.

— Ме, пиө,— нораа шыасис сэсса,— кула да тундранымөс  
төкөтө содгышта, мылькторйөн лоа, вутшьюрө пөра.

Жалитана ышловзис Митрук. А сійө, дерт жө, лоас енэжас  
медся яр кодзувөн, сюся мөдас видзөдны му вылын олысьясөс,  
оз лэдз некодөс весьшөрө кедзовтны.

Янгереийн Митрукөс пыр жө водтөдісны больничаө, бать-  
ыс сэсса өтносөн муніс. Детинка первойысь торьяліс тшына  
рөднөй чомсыс, мам-батьсыс, көрьясысь, поньясысь. Ставыс  
лои өти здукөн сэтшөм жаль, көть сыркьяв бөрд, но яндзим  
еджыд халата врачсыс, коді сідзи и емалө ёсь видзөдласнас.  
Больничаыс сэтшөм жө нейджыд керкаын, кутшөмъясын сик-  
тас олісны йөзыс. Улич вылын мөсьяслөн ни ыжьяслөн баксөм  
эз кывлы, сөмын гырысь поньяс пурсисны туй вылас шыблалөм  
лыяс вөсна. Митрук ставсө тайөс видзөдіс койка вывсянныс  
өшинь пыр, стөчджыка кө, висигмоз, сылы эз позь не сөмын  
петавны ывлаө, весиг чечывны мөгтөг койка вывсьыс.

Больничаас нөшта мөд висьысь сөмын и вөлі — сө арөса  
кымын бабө, коді лун и вой помся куткырвидзис койка вылас.  
Көть бабөыс омөля кыліс, но сёрнитіс помся, Митруклысь  
сөысь нин юаліс бать-мамсө. Митрук быд пөрийө вочавидзліс,  
мый сійө Макар Саньлөн меддзоля пиыс.

— Бур на көть тэ висьмин,— унаысь нин Митрук кывліс  
та йылысь бабөсянь,— а то чунь өтнам больнича пасьтаыс,  
пөрысь висьөмысь лечитөны, быд гожөм таdzi, вотчан пөраас  
сюйлөны татчө, гортын некод абу да. А тан нө кысь жө вись-  
ысьыс, найө, бобө, оз туплясьны, больничаад оз уськөдчыны  
шоньд пөраас. Быдөн шонді-матушка борд улын пөжсьө.  
Менам моньө, ен мед видзас сэні лөк йөзысь, бара шоньд  
море дорө лэбис. Воас да куыс сьөмга моз лөсталө, синьясыс  
шөйтысь каньлөн моз югзьөны. Бур моньө, дона моньө бара  
көні шляйтчө, көбыла улысь усьөмаыс. Пиө менам рам. Тэ  
тай рам детинка жө кодлөнкө. Кодлөн нө ачыд? Буракө, вись-  
тавлін нин да ог кыв-а. Пөрысь висьөмсьыд, пиө, он жө и бурд-

ны вермы, больничаад көть мыйта кыскаласны. Некор эн пöрысьмөдчы, мада пиö. Висьталан кө эськө, ай-мамтö тöда да. Том дырйи тундрасыс став йöзсö тöдлi. Ме öд зэв нин важся. Помнита да, менам челядь дырйиыс шондiыс на том вöлi, öнi тай и сийö, мада, чусмыны кутiс.

— Сийö, бабö, тэнад синмыд пемдö, — шуис Митрук.

— Вомыд мыйкö эськөн вөрö да ог гөгөрво. Том дырйи ёна збой вöвлi, вотöссö карнанön нюрсыс кыскавлi, кык ведра пысала да. Öнi тай тусөн вайыштöны. Тэ вотчан жö?

— Сёя толькö.

— Вомыд тай бара вөрзбыштіс, лолыд тай пытшкад на?

Он тай и чеччывлы?

— Чечча кө — уся бөр.

— Том дырйиö, ок, мича вöвлi. Ном мында жöникыс бöрсянь вöтлысис. Ёна и öвтчи наысь грекö вöйтiысьясысь. Öти тай курчис жö, ой! Мый и абусö сöра. Тэ öд көнкö нинём он гөгөрво, дзоля на да. Кодлөн нö эськөн ачыд лоан?

— Верми кө эськө чарöстi пель бокад да! — скöраліс Митрук.

— Самöварсö тан оз бара пузьöдлыны. Но ладнö. Ратшыс воас да трубка пырыс висьталас. Ставыс кө эськөн трубкаön сёрнитiсны бура на кылi. Со и ратшыс татчö тувччалö. Кокни кок йылас. Ме том дырйи сы кодь жö вöлi пельк да лöсьыдик. Толькö льöбыс вывтi гöрд, виrатор ли мый ли век сёйö. Тэ он тэд?

— Ог, — Митрук збыльысь эз тöд, мыйла врачыслөн парйыс пув кодь гöрд. Тундрасаяслөн парьясыс тшöкыда овлöны лöзöсь, кынмыштöны да, а нарьясныс мыйлакö векджык гöрдöсь. Том врачыслөн, мöдарö, нырыс еджыд, быттьö на еджыд пызьён буситыштöма.

— Кутшöмджык нин здоровьeыд, бабушка? — врачыс кузь трубка пыр сёрнитiс варов бабкöд.

— Ой, бур! Тöрытья серти нöшта на бур.

— Быд лун шуан тöрытья серти бурджык. Сiдзи оз овлы.

— Мый нö озыс. Менам пöраö быдтöрйыс вермас лоны.

Тöрыт тай юмов лекарствоон толькө вердін. Курыдторсө аппетит вылас эн и кут мыччывлыны. Пышъя өд, мада нылө, тадзтө больничасыд. Рөбөтатөг колян.

— Моньыд курыд вылас деньгасө этша колис. Сытөг олышт.

— Мада моньö, бур моньö, көні и ветлө йөз муас да йөз дорас. Усис жö кыскö менам юр вылө, лөк эг вöчлы некодлы-а.

— Ланьтлы, бабушка, детинкасö сэсса видлала.

Врач температурасö зонкалысь видлаліс да пытшкөссө трубка пыр кывзіс.

— Омоль делөясыд, Митреюшко. Көні нө тадзисö кын-тысин?

— Му вылын узи.

— Мыйла нө му вылас узян? Оз өд позь.

— Унмовсьысьöма тай, — эз кут стöчмөдавны Митрук.

— Но, но инö. Öні дыр тані бурдөдчыны кутан, тадзитө узьöмысь.

Митруклөн бурдөдчан кадыс збыльысь ёна нюжаліс. Батыс кыкысь нин воліс писö видлыны, вайис би вылын тшындөм теля ордлыяс, косьтөм чери. Митрук öні сөмын, макарона да риса шыдъяс панялөм бөрас, казяліс, кутшөм чөскыд вөлөма сёяныс сылөн чомйын. Врачыс сідз жö ошкис да корис, медым батыс тшөкыдджыка воліс татшөм гөснечнас.

Митрук больничачын мөдіс жируйтны өтнас, дзодзөгъяс лэбан пөраө лунвылысь бергөдчис бабөлөн гождьялөм моньыс, нуөдіс старукаөс гортас. Детинкаөс лэдзлывліс нин врачыс сиктө. Митрук дыр шөйтіс изья берег кузя да шензис гыалысь мореөн. Ас кодыс жö кымын детинкалысь өтчыд юаліс:

— Мый нө эськөн сәні ва саяс?

— Ва саяс ва, — веськодя вочавидзис детинка.

— Помтөм ва оз вермы лоны, — эз сөгласитчы Митрук. —

Ставыс мыйөнкө да помасьö.

— А вот и оз. Айко сылысь помсө абу на адззылөма. Йиясö пө тшукан, дыр кө мотора пыжөн мунан.

— Сійо и помыс сідзкө, — кывкөрталіс сёрнисö Митрук.

Берег дорын туплясисны съодасьом керъяс. Найос пö шыблао саридзис. Туплясисны морт юр ыджа гөгрөс көрт бакъяс, табъяс пö морейн тывъясысьяслөн. Морейс пö ставсö бөр мыччö, мый сыö усьö, нинөм пö аслыс оз босът.

Көть Митруклы кажитчис сола төвъясөн пожъялом посёлкыс и век шыалысь морейс, но век жö ёна дзугыльтчис аслас тундра вöсна, бөр сійос кыскис чомйö. А врачыс пыр на мыйкö кыліс кузь трубка пырыс сылөн морөс пытшкысь. Митруклы весиг кутіс кажитчыны, оз-ö врачыс мөрит сійос чöскыд гөснечьяс вöснаыс.

— Лок миян чомйö овны, — ötчыд корис врачсö Митрук.

— Ог мун тиян чомйö, меным тані колö йöзсö лечитны.

Первойя лым усьом бөрын врачыс лэдзис Митрукөс батыскөд туйö, öні пö дзикөдз нин бурдін, сэсса пö эн кынтысь. А Митрукөс шымыртіс мөд пөлөс шог, босьтасны-ö таво сійос нолевояс, öд сійö ёна сёрмис и ещö на сёрмас, пока стадаөн кыссясны сиктөдз, төвъянинъясөдз. Батыс висьталіс, гождөмнас чомъясті лэбалөма вертолёт, чукөртөма велөдчан арлыда челядьöс. Висьомыс эськөн и кутшөмакө кивыв лоис, моресө адзыліс, а югыд бияснас манитысь карыс век жö бокö коліс. И веськавлас-ö сэтчö коркө Митрук? Сійö эз на төд, мый сылөн олан кадö быд туй вайөдö кутшөмкө карөдз.

## МЫЙЛА КУРИТЧӨНЫ ПАСТУКЪЯС



Первойя лымйыс, кыдзи тшөкыда овлө, помөдз сыліс. Рудөдөм тундра весьтö öшиисны кымөра букыш лунъяс, а войясыс лоисны сап немыдөсь, көть синмад тшукөдасны, он казав. Татшөм войяснас торъя нин сюся колö видзөдны көръяс бөрся, көинъяс помся бергалөны стада гөгөрыс. И, дерт, оз весьшөрö, көинъяс айбарчасьлөны, джагөдөм көрыслысь асывнас сөмын сюрсö да гыжъяссö аддзан. Быд татшөм случай

дырйи батыс лунбыд матькысыö понъяс вылö да пастукъяс вылö. И Митрук гөгөрвоö батысö: бригадирлы быд ловъя гөнтөр вöсна колö кыв кутны.

Медся пемыд войяснас батыс ачыс петавлö дежуритны стада дорö. И быд войся смена водзын көрт пач дораныс косьтö махорка пачкаяс.

— Табакнытö косөн видзö! — такöдö пастукъясöс бригадир. Уль табакыслөн куш тшын, öгырыс оз усь. Öгыра каллянсьыи и то зверыс полыштö. Вомсыныд оз ков лэдзыны войнас каллянныдтö!

Митрук войяссö оз жö узь, батыс дадь бöжын куткыр-видзö. Мамыс эськөн оз лэдз чомсьыс вой улас, но бригадир абу паныд, мед пö ветлöдлö.

И со талун бара петисны стада дорö. Батыс домалис дадювсö да веськөдчис кытчöкö подөн.

— Эн унмовсь, пиö, а то кöиныслы пинь улас веськалан.

И кыдзи сэссия татшöм кывъяс бöрас сибöдчас ун. То ылыстчö, то саявлö батыслөн öгыралысь калляныс. И Митруклы абу нин сэтшöм шуштöм, кор тыдалö му кузя визъялысь кодзувторйыс. Но сийö кытчöкö вошис. И дыркодь оз петкөдчы.

— Аие! — горөдiс Митрук.

Кылис батыслөн воча кыв, буракö, гөпторö лэччылöма, либö выль каллян гаровтö. Но биыс абу и абу. Раскö йөрмис батыс? Öдавкö, оз бара сийö сэтчö пыр. Митруклы помся чуксасыны яндзим, оз кöсиы лоны кöч кодь полысьөн. Мөдiс öзтавны истөг тувъяс. Со и истөгыс нин бырны кутiс. Мый вöчны? «Каллян колö гаровтны!» — воис мездана мөвп. Махорка пачкаясыс дадь бöжас картон көрөбкаын... И бумагаыс сэни, стöчджыка кö, гожся почтаыс, кодöс вайлöмаöсь Митрук висиг костi. Пестiс Митрук кыз каллян, курыд тшыныс небыд горшсö чепльöдлö. Тшökъялö и несъялö детинка. Но мый вöчан, быд пастуклы быть колö куритчыны, гожöмнас номъясöс тшынöдны, арнас со кöинъясöс повзьöдлыны. Он кö куритчы, абу пастук.

— Куритчан, пиö, — мышсеяныыс матыстчöма батыс.



Оги асылö Митрук мөддөчис школай

— Өзті тай өтиөс, гажтөм да.

— Эн пытшкад кыскы тшынсө,— велөдіс батыс, вом пырыд сөмын лэдзышт,— велалан куритчынысө да школаад делө лоө.

— Табаксө сэн оз сетны?

— Оз, пиө, оз. Сэні өд ном ни геб абу, көиньяс абуось ни, сідзкө, нинөмла сэні и куритчынысө.

Көть Митрук и вом пырыс лэдзалис тшынсө, но регыдөн лючки сирасис табак дінас. И бур пастук моз вөлі шпуткө.

Арыс кузя нюжаліс, дыр эз вермы кынтыны визув юяссө да зыбуч нюрьяссө. Төвьяніньясө, сикт дорө, воисны сөмын выль во бөрын.

Төвся каникульяс дырйи, кор Печора вылын трачкөдчисны ныр чепөльтана көдзыдьяс, өти асылө Митрук мөдөдчис школаө. Ыргөн кружкаыс пөжөм йөв юөм бөрын лючки пасьтасис. Митруклөн кодь мича да шоныд паськөмыс сиктса челядь пөвстын некодлөн абу: кокас пидзөс вылөдзыс еджыд пими, кодөс пидзөс горувтіыс шыркнитөма тугья гөрд вөньөн, маличаыс кык пөвста, уліас сьөд неблюйыс, выліыс еджыдыс, сос помьясас, кытчө вурыштөма гөна кепыссьө, өшалөны ичөтик колокольчикьяс. Айыс арбыд вөлі тэрмөдлө мамсө, дзоля пастуклы пө медся бур вольяссьыс маличасө вур. И со вурисны завидьтанаторсө, некутшөм көдзыд оз мөрччы и выліас кыш кодь кокныд.

Еджыд малича вылас вомөналіс кузь көвья сьөд сумка. Сумкаыс тыртөм на, сөмын махорка пачка да истөг көрөб суйыштис, бумагасө эз босьт, школаас пө сійө бурыс тырмымөн эм.

Лабутнөя осьлалө Митрук керка өшинь увьясті южмөдөм дзуртыс туй кузя, өвтыштас кокныдик өти соинас — дзын, мөднас — тронь. Тувччалө, быттьө ворсөдчө, челядь котыр бөрсяныс лөктөны, шензьөны Митруклөн паськөм вылө.

Со и сиктса школаыс, кильчөыс чышкөма и гөлик дасьтөма, челядь чышкөны гынкөмьяснысө гөликөн. Митрук сөмын

вачкыштö кокъяссö öта-мöд бердас, мольыд көр гöнас лымйыс оз сибды.

Водз на. Учительницаыс, Дарья Ивановна, абу на воöма. Челядь кытшалісны Митрукöс, быдөн корö пасьтавлыны малічасö, но сійö некодöс оз сибöд, гырысьджыкъяслы шуö, ыджöданныд пö юрсö, төв пö мөдас юр гөгөр шутьялвны, ичөтджыкъяслы оз жö позь, зырымнаныд пö ляканныд вом дінсö. Көр видзысьяс йöзлы малічанысö оз радейтны сетны, и асьныс бокöйісö оз кышавны, зывөктöны. Митрук та йылысь оз гарав.

— Тайö малічасö меным бура пастучитöмысь вурисны, — төдчөдіс Митрук да перйис тыртөм сумкасьыс восьтытөм на махорка пачка, корис Максим другыслысь водзöсөн бумагатор. — Настоящöй көр видзысьлы куритчытöгыс оз позь, — гөгөрвоөдіс Митрук. — Арся войясыс пемыдöсь, көиныс вермас асьтö теля пыдди тшапкыны. Куритчигад сійö öгырсьыс полö.

— И табак тшынсьыс намернö, — Максим шлопкис Митруклы ныр улас бонзьөдөм нин сьод портфельсö. — Тайöс гожөмнас юр кыскалөмысь. Семöлы эськөн, гашкө, сетісны жö, да лёк сёкурыс\* чужйыліс плешкас. Видзöдлы.

Кельыд чужöма Семöлөн кымöсас збыль төдчис бурдөм вурис.

— Мый пөръясян? Ачыд тай изйөн веськалін да ме сэсся дугді видз вылас ветлынысö тэкөдыд. Айколы висьталі да бура тай повззылін.

— Ме? Повззылі? Колөкө, öні на лөсышта бара!

— Школасьыс лэбзян сэки.

Кык друглөн вензигкості Митрук гаровтіс кыз каллян да мөдіс куритчыны.

— Охо, оз тай некодысь пов көр видзысьыс!

Быттö лэбыштіс-пырис школаö банийөм чужöма том учительница.

---

\*Сёкур — мерин.

— Ой, коді куритчө тани?

Митрук эз шөйөвош, лабутнөя тшынасис парта сайын.

— А тайө выль ученикыс, Артеев, миянын оз куритчыны, — стрөгмис лөсьыд чужөмыс учительницалөн.

— Мыйла? — шензис Митрук.

— Школа тайө!

— Колхоз правлениеын куритчөны, конюшняын куритчөны, чомйын куритчөны, керкаясин куритчөны, ывлаын куритчөны, школаын — оз позь!

— Челядь тани велөдчөны, гөгөрвоан?

— Челядьыс абу өмөй йөз жө?

Учительница быдсөн еждөдіс скөрмөмысла:

— Мун, колөкө, куритчы чомъяд. Өні жө шыбит пачас каллянтө!

Митрук оз радейт, кор сы вылө кодкө кыпөдө гөлөссө. Тайө нин вывті, муткыльтчис пытшкөсыс, тшапкис маличасө да петіс ывлаө. Дышпырысь довгис гортас, керка дорын батыс туйө дасьтіс дадүвсө, лөсьөдчис кайны чомйө.

— Мый сэтшөм водз лэдзисны?

— Ачым локті. Школаас куритчынысө оз лэдзны! — өбидаясла Митруклөн доршасис синваыс.

— Ме жө шулі, пиө, сэн оз лэдзны. Водзджык колі пөттөдзыд куритчынысө. Өні оз позь.

— Кыдзи нө дугда, велалі да, — бөрдазис Митрук. — Ачыд тай небось куритчан.

— Ме нин, пиө, тош новла, а тэнад оз на быдмы.

— Он өд тошнад куритчы.

— Яд аддзөмаөсь табаксьыс.

— Кутшөм яд?

— Никоти... никоти... — батыс вомсьыс перйыліс каллянсө. — Сідзи кө-а...

— Мыля нө водзджыксө ин висьтав?

— Колхоз мавлениеын казялөмаөсь неважөн на. Сэн, пиө, няньсө весь оз сейны. Ачым водзджыксө эг төдлы.

— Айко, тэ нө мыля вомад ядсө кутан? Кулан кө!

Батыс некымынысь помся кыскыштліс каллян помсö, öгырыс сотіс льöбсö да вöлисти сьöвзис:

— Ог сэсса куритчы. Помала жö. Смотри, тэ сэсса дугды табакнас балуйтнысö!

Митрук дугдіс куритчöмысь. И кор верстьö мортön лоис, став лов тырнас кутіс зывöктыны чигарка нёнялысьяссö.

## МИТРУКЛЫ ОТСАЛÖНЫ КНИГАЯС



Митрукöс парта сайö пуксьöдісны Даша нима ныв-какöд, а эз Максим другыскöд, кызди ачыс кöс-йис. Даша көр бöж кодь ичöтик көса торъя, пельясыс көчлөн моз чошнитчöмаöсь, ыджыд лöз синъясыс быттьö век мыйыськö шензьöны. Даша оз öтдортчы Митрукысь, быттьö на рад кодь, окотапырысь мыччалö книгаяссö, петкöдлö, кытчöдз нин воöмаöсь. Но Митруклы веськодь, помсö көть шöрсö Даша восьтас аслас букварлысь, сійö ни öти шыпас на оз сяммы торійöдны öта-мöдсьыс. Гашкö, та вöсна Митрук век öшыыштöма парта дорышас.

— Усян да гырдазаяд потас, — кыскыштö асланысь ыръян детинкаöс Даша.

— Меным тадзи бур, — пыксьö Митрук.

— Артеев, веськыда пуксы, — тшöктö Дарья Ивановна.

Тадзи кольöны лунъяс, вежонъяс, кытчöдз Митрук лючки эз велав пукавны парта сайын.

Öти ыджыд жырийын нель класс: нолевöй, первой, мöд да коймöд. Быд класслөн аслас парта рад, быттьö чом дорын аргышъяс сулалöны. И став тайö аргышъяссö нуöдö öтнас Дарья Ивановна. Öтияс лыддысьöны, мöдъяс гижöны, кой-мöдъяс сьöд дöскасö еджыд мелөн серöдлöны. Серöдласны-серöдласны, а сэсса бара чышканы. И сідзи помтöг. Некодлөн зэв бурасö оз артмы да.

Нолевöйын медся гораа лыддысьö Даша, вом дорас вайö-дас букварсö да шыранөн моз тшытшлö кывъяссö: «Му-нö

вө-ла. Сё-йö Да-ша вы-я р-ок». Митрук мый вынсьыс кутö серамсö да он тай сийöс ас пыткад томнав. Мый дыр кутан, сымын öдöбөн ылькнитö. Сэтшöма серöктыссьö, плешнас ковгысьö партаас. Сы бöрын ызöбтö-серöктö дзоньнас классыс.

— Артеев, петавлы посводзас да сэни серав пöттöдзыд.

Но кöдзыд посводзын Митруклы мыйлакö ньöти оз серавсьы, регыд бөр веськöдчас классö.

— Серавсис?

— Кушöдз.

— Пуксьы да гиж палочкаястö.

Митрук шензьö, мыйла тайö ичöt хорейяссö, кодьясöс рисуйтис нин тетрадь джынсö кымын, учительницаыс шуö «палочкаясөн»?

Велöдчан во помöдзыс Митрук ачыс велалис букварсьыс кивьяссьö тшытшлöмөн шуавны, а Даша дугдис тшöкъявны. Öни нин Даша Митрук пыдди петавлывлис посводзас. Но Митрук ёна старайтчис гортас да регыд и суöдис Дашаöс. Кор кузь кив веськалö, сэки Митрук дыр кежлö джёмдылö. Даша бокас тувкöдö: «Чери лы öмöй горшад сатшис?» Митрук оз скöрмöдчы, медым делöсö не торкны, кöть мый дыра букваыссьö песас вомгорулас. Медбöрын, кор Митрук заводитö ньылöдны, Дарья Ивановна отсöг вылö воö:

— Гортад лыдды да аски гораасö шуан.

Со и гажа тулыс воис. Челядьöс лэдзалисны гожся каникуляс вылö. Ставөн разöдчисны тшакалысь арся кöрьяс моз, кодi видз вылö бать-мамлы отсасьны, кодi пионерскöй лагерö, кодi прöста Печора бокин төв песö, няйтын гудыйсьö да дзув лыа вылын туплясьö.

А Митрук некытчö эз веськав, сийöс, кыз медся дыш пелейöс, вунöдисны лэдзны дадöвсьыс ставныскöд тшötш. «Чистописаниеысь» вося оценоксö Дарья Ивановна петкöдис «двойка» и став водзас шуис, он кö пö велав гожöм чöжнас мичаа гижны, бөр колян нулевöйö. Митрук весиг аслас ёртъяс вылö эз лысьт лэптывны синсö, сэтшöм сылы яндзим лои, öд сийö сидзи нин öти воөн ыджыдджык наысь, а бара на нулевöйö

йөртөны. Весиг ассыс партасө зывөктыны кутіс. Но партаыд абу ловъя, нинөм эз вочавидз. И со Митрук быд лун воывлө школаө, гижө букваяс да кывъяс. Ладнө школаыс век восьса, стөрөжикаыс сәні олө, көть кор лок либө мун. А гортас занимайтчыны Митрук эськөн эз вермы, ёртъясыс кыскөны ывла вылө, а сәсса лунтыр кежлө ылалөны. Та вөсна Митрук некодлы висътасътөг уйкнитө школаас гусьөн.

Гижө Митрук, гажтөмлунсө пөдтө, а шыпасыс ой уна, и быдөн мыйөнкө торъялө өта-мөдсыс. Абу тайө нярталасьыд нель пратьыс, кодъясөс век өти ног гартөны. Кор кыис мудзас, Митрук видзөдө белитөм пөтөлөкас да мөвпалө, өшиньө видзөдлыны оз лысьт, мед не адзыны ворсысь ёртъяссө. Век өтиторджык юрас бергалө, коді та мында шыпассө лөсьөдлөма, эз-ө позь этшаджык и мөд ногджык, медем кокниджык вөлі гижны.

Өтчыд таdzi мөвпалігас и суис сійөс Даша. Дзирійыв восьтіс класс өдзөссө:

— Со көні дзебсясян. А тәнө корсьөны.

Митрук звирк чеччис да тшапкис Дашаөс чурвидзысь көсаөдыс:

— Кыйөдчин! Öнi жö усйысь! — горөдіс Митрук. — Мед дукыд некор эз вөв!

— Вөтлан кө, удта, — бөрддзыны лөсьөдчис Даша. Митрук лэдзис көсасө, збыль өд удтас, и сәки быть нин ковмас сисьтыны нулевөй пельөссө.

— Митрө, ме тәнө велөдны кута, Дарья Ивановна моз жө.

— Смотри, висъталан кө кодлыкө — көсатөг колян. Шпионка! — вежыньтліс льөбъяссө Митрук.

— Вай, бурджык, видзөдла тетрадьтө, оцєнкаяс пуктала.

— На! Сира гез, — небзыштис сьөлөмнас Митрук.

— Ой! Рөдад юысьяс эмөсь? — Даша листаліс тетрадьсө. — Букваясыд тай кодось!

— Кодось? — чуймис и Митрук.

— Вежнясьөны тай дурпоп моз-а, — стрөга шуис Даша. — Хлюс гажаөсь.

— Збыль өмөй кодось? — пель йылөдзыс гөрдөдiс Митрук. — Ок, бара на нулевöйö!

Гашкө, збыль рөдас кыскө? Мамыс тай повзөдчывлө, кодкө кө пакосьть вөчас, кинас өвтыштас, рөдыс пө налөн сэтшөм, рөдас пө нуö. Митруклөн мамыс винасө вомаc оз босьтлы, гырысь чой-вокыс оз балуйтчыны. Сөмын батысь шоммөдчывлө да мамсянь дядьясыс вина гаг кодьось. Со өд: кык вожсянь лөкыс локтө. Кысь сэсся букваысыс садьось лоасны, көть кызди эн мырсы. Шөгө вöйи Митрук, позьö шуны, юр вывтис. Кутшөм оцeнка со пуктас öнi сылөн выль учительницаыс-а? Митрук думнас көть нин «трияс» виччысис. Öд төлысь чөж пессис да көнкө мыйтакө водзлань воськовтiс жö.

— Артеев, босьт тетрадьтө да водзö уджав, — Дарья Ивановна гөлөсөн стрöга шуис Даша.

— Ачыл нö мый, коктөм? Он вермы вайнысö?

— Артеев! Мый ме кыла! Ну-ка, пет классыс!

— Видзөдлам, кодным петам, — Митрук босьтiс тетрадьсö да пуксис аслас местаö. Восьтiс и ыркмуниc сьөлөмыс: Даша шняпөдöма гырысь лөз «единицаяс», быттьö тшөг гутъяс дөв-видзöны еджыд чери сьөм вылын. Митрук здукөн вур-вар-вөчис тетрадьсö.

— Дашко! Джагөда! — камгис парта пөвъяс кулакнас, звирк чеччис, ур моз лыйыштiс партаяс вомөн. Но и Даша пельк вөлöма, шыр моз уйкнитiс өдзөс костöдыс, төкөтьö Митруклысь нырсö эз пөдлав.

Митрук бөр довгис аслас местаö, ывлатi Даша бөрся котравны сылы некутшöма эз вөв кивыв, вермисны казаявны зон ёртъясыс, нимтыны сiйöс Дашакөд «жөник да невестаөн». Öти нин тайö думсыс Митруклөн мөдiс доймыны кынöмыс.

Митруклөн көть вöли на снитки выль тетрадь, шыпасъясөн сiйöс лякөсьтны эз мөд, пеж рөдсö паськөдны эз кут. Сiйö öнi скöралiс не сөмын Даша вылө, но медсясö кодалысь шыпасъяс вылас, аслас рөд вылө, кытысянь паськалө лөкыс. Сьökыд шөгсö гырдазаяснас Митрук пыкис серөдлөм парта пөвийö. Весиг гырдазаясыс доймыны кутiсны, но эз вөрзьи некодарö.

Татшөм рамасө сійө некор на классын эз пукавлы, веськыда дзоргис гирсийдлөм съод дөска вылө да мөвпаліс. Но мөвпыс быттьө кынмөма, водзө оз тувчы, весиг юрсьыс петөма. Мичаа гижны сійө, буракө, оз вела. Өні та йылысь сөмын на Дашко төдө. А казьясны кө ставөн сылысь рөдөвөй висьөмсө? Прөщайтчыны ковмас школаыскөд. Либө водзджык усыйсьны бөр рөднөй тундраас? Туйсө лючки оз төд, да и дадюлыс өні сылы кысь.

Митрук лэдзис юрсө парта вылө и сылы лоис кокниджык, шогыс, буракө, тшөтш лажынтьчыліс. Дыр-ө Митрук парта пөвсө шонтіс, эз төд. Но шондйыс нин рытиввыв өшиньөдыс дзоргис. Дөза дыр узьсьөма. Шогыс эз нин личкы, дыр-ө кежлө, но энөвтөма сійөс. Митрук матыстчис шондї водзын гождьялысь книжнөй шкап дорө, бөрийис гырысь букваыса книга. Сэні висьтавсис сы кодь жө детинка йылысь, кодөс торйө-дөмаөсь бать-мам дінсьыс. Детинкаыс өна гажтөмалө, весиг письмө гижис дедыслы, мед бөр босьтас лөк йөз дорсьыс. «Быдлаын шог песөны...» — пөдлаліс сөр рытын книгасө Митрук. Дум вылас уси тундраті ветлөмыс, бать-мамыс, сера сүмөдөн кышөм ёсь йыла чөмйыс. Көнкө өні батьыс вундаліс дадювса көрьяслысь гөна сюрьяссө (мораяссө) да жаритө роска би вылын. Митрук ньылыштис дульсө да котөртис гортас, бабыс важөн нин виччысьөма сійөс, пач пытшкас пөжөм йөв видзөма. Дерт, йөвсө мораыскөд он өткодяв.

Митрук воддза моз ветлөдліс школаө, көть гижөмсьыс дзыкөдз энөвтчис. Сійө водз асывсянь сөр рытөдз лыддьысис. Кодыр гырысь шыпасьяса книгаысыс бырисны шкапсьыс, кутчысис география да история учебникъяс бердө, төвнас, көть пель пөвнас на, век кывзис, кызди коймөд классаяслы Дарья Ивановна висьтавлө ылыс муяс йылысь, көні весиг пө төлыс оз овлы. Тайө вөлі Митруклы дзык гөгөрвотөмторйөн. Төлыс абу. Кызди? На дорө тай гождөмыс гөститны моз сөмын волө.

Өтчыд тадзи лыддьысигөн школаө ыджыд зыкөн пырисны өртьясыс.

— Со кӧн! Митрей-хитрейыс дзебсясьӧма! — нетшыштісны кысьыс книгасӧ да кыскисны парта сайысь.

— Учебникъяс нин лыддӧ! — шензис Максим.

— Шкапсыс унджык книгасӧ нин помалі! — юрсӧ чатӧртлӧмӧн шуис Митрук.

— Сӧ-ӧр вай! Тундрасаясыд ставныс радейтӧны ошйысьыштіны.

— Ог. Ме збыльысь велалі зэв ӧдйӧ лыддысьыны. Ачым эг казявлы, кызди тайӧ артмис.

— Нолтӧ, петкӧдлы, петкӧдлы! — корисны челядь.

Митрук восьтіс книга шӧрсӧ да мӧдіс сяркӧдны-лыддыны.

Челядь шай-паймунісны. Здукӧн гӧгӧр чӧв лои.

— Тадзи коймӧд классад некод оз лыддысь, — шыасис Максим.

— Дзик нин учительница моз сяркӧдӧ тай, — шыасис бокланьын сулалысь Сеня.

Дыр на сэсса шензисны челядь.

А регыд сэсса и выль велӧдчан во заводитчис. Учительницаыс, Дарья Ивановна, гожӧмбыднас ӧна гожъялӧма да ещӧ на мичаджык лоӧма. Челядь ставӧн синнысӧ гӧгрӧстӧмӧн видзӧдісны сы вылӧ.

Дарья Ивановна медводз иналіс школаӧ первойысь воысьясӧс, сизим арӧса нывкаясӧс да зонкаясӧс пуксьӧдаліс ӧшиньдорса радӧ, тані пӧ тіянлы югыдджык лоӧ.

— Ӧшиняс позьӧ ляскысьлыны? Кутшӧм бур! — радлыштіс еджыд юрсиа нывка.

— Оля, ӧшиньӧ видзӧдысьясӧс кута ыстыны коридорӧ.

— Ой! Сэні ӧд пемыдінас дикма.

Дарья Ивановна орчӧналіс парта сайӧ нывкаясӧс зонка-яскӧд, чайтіс, тадзисӧ лӧньджыка мӧдасны пукавны. Митрук гусьӧн радліс, нулевой радӧ места сылы эз коль. Медводз класс пасьта чилӧстіс Оля.

— Мый нӧ?

— Ванько курчис пельпомӧс, — бӧрддзис Оля.

— Ваньӧ, школаын курччасыны оз позь.

— Ачыс... ачыс... — Ваньö гөрдөдiс пель йылөдзыс, — чорыд гырддзанас ачыс, ачыс...

Пуля моз чеччыштіс местасыс да чарөстіс гөгрөсіник Дуся. Ставөн вак-вакөн серөктісны.

— Мый нө лои?

— Петюк улісянь чепөльтіс. Лөзө-өдз!

— Мыйөн төдан. Лөзөдз? — эз сетчы Петюк.

— Колөкө, петкөдла, — эз йөрмы Дуся.

— Дуся! Школаын нинөм оз ков петкөдлыны.

Та бөрын нывка ёртъяснысө кедзовтыштны мөдiс. Учительница выльысь «сортируйтiс» нулевикъясөс.

— Пуксялөй, кодi кодкөд көсiө, — ышловзис учительница.

Зонкаяс зонкаяскөд, нывкаяс нывкаяскөд ёртасисны. Сөмын медся рам өти нывкалы да зонкалы эз коль ас серти ёртыс. Дарья Ивановна пуксьөдiс найөс медводдза парта сайө: налы вөлі дзик веськодь. Сөмын та бөрын Дарья Ивановна кузя видзөдлiс Митрук вылө, ёсь гыж помнас гудйыштіс пель дорсыс кудри увсө да юалiс:

— Артеев, вөчин гоҗся уджтө? Көни чистописаниесыд тетрадьд? Петкөдлы!

Митрук чөв оліс да зумыша видзөдiс джоджө.

— Көни нө тетрадьд? Эн өмөй нинөм вөч?! — Дарья Ивановна чөвтліс видзөдлассө нулевикъяслань. Классын лои шы ни төв. «Нулевикъяс дорад ог пуксьы, мырдөн кө кутас, пышъя тундраө», — артасис Митрук.

— Сiйө гижөм пыдди өтарө лыддысьсөма, — сувтіс парта сайысь Даша.

— Зэй-зэй өддьөн лыддьө, — кывлысис Максим.

Дарья Ивановна ветлөдлiс партаяс костөд да мөвпалiс. Сувтіс Митрук весьтө:

— Артеев! Дыр-ө тэ мөдан нулевөй пельөссө сiсьтыны?

Митрук юрси йылөдзыс гөрдөдiс. Да, сылы арлыд сертиыс колө нин мөдөд классын велөдчыны, а сiйө со первойөдз на эво. Тайө тундраса быдтаслөн медся дойманiныс. Казялө өмөй слысь гуся вийсьөмсө Дарья Ивановна?

— Пуксы Даша дінө. Омөля кө кутан гижны, бөр косөда нулевөйас. Абу ылын.

Митрук көть думнас аттьөалис Дашаөс, но орччөн пукавны сукөд, нырсө быдлаө суйысыкөд, век жө эз көсіы. Кияс еджытөдзыс чабыртис парта дорсө, быттьө тшөтш сійө вөлі мыйөнкө мыжа.

— Пөвсө чашкөдан, — шөпкөдіс Даша. — Бара коридорас ыстасны.

«Синмө сатшкысысы ув, — думнас вочавидзалис Митрук Дашалы. — Кор тэысы мынла...»

Мөдөдчисны арся букуш луньяс. Ывлаын помся зэрис. Зэр тусыс овлө гырысы, но ёнджыка буситө пож пыр лэдзөм кодь посни зэр. Митрук парта сайысы юрсө лэптывтөг гижис шыпасъяс да кывъяс. Митруклөн гижөдыс век на кодаліс. Пуксясны-ө найө коркө усыпаньвыв? Өдвакө. Кодлөн мый вирас пырөма, он вушты. Пөжис Митрук ас улас гуся дум: воас батысы тундраысы даддьөн, нуөдас писө чомйө, өд ачыс мыжа, мыйла оз артмыны сылөн мичаа букваысыс, оз ков тшөкыда шоммөдчывлыны сьөд чом пельөсас. Но и мед, лоас бригадирөн.

И со вевтис сьөд мусө еджыд лым. Сідзкө, абу нин ылын батысы вотөдз. Өти татшөм асылө Дарья Ивановна шыльөдіс шоньд кияснас Митруклысы гынзвөм юрсисө, лючкиджык нин пө кутін гижны, ещө пө старайтчышт, бобө. Митрук вось-тис тетрадьсө и чуймис: нюмъяліс сылы воча ыджыд мыгөра гөрд «три». Эз-ө Дарья Ивановна сорась? Но, буракө, эз. Регыд Артеевлөн гижан тетрадыс «четыре» чужис.

— Но, палялісны букваысыд! Оз жө өд сэсся помтөг мөдны кодавны, — чашкөдіс синьяссө Даша. — Кыдзи менам айө шуө, кодыд пө узяс да төлкмас, а йөйыд пө кутшөм водас, сэтшөм и чеччас. Сідзкө, тэ, Митро, абу на йөй.

Лючки пуксис төв. Шоръяс да тыяс вевттысисны шыльыд йи эшкынөн, сөмын Печоралөн ва туйыс урөса кынмис, торо-сасис, чукыр-някыра эшкынөн шебрасис. Но сәті регыд турөбъ-ясыс шыльөдісны. Өти төвся лунө Митрук видзөдліс өшиньө

и звирк чеччис парта сайсьыс: сикт горулӧд, шар кузяыс рӧдтіс айыслӧн нель кӧра дадюлыс. Ас ногыс гӧгӧрвоис Дарья Ивановна Митруклысь радлунсӧ. Гашкӧ пӧ тэ, Артеев, вочавидзан тайӧ вопрос вылас. Учительница нуӧдіс коймӧд классаяскӧд история урок. Класс чӧв оліс. Митрук бура кывзис гижигмозыс коймӧд классаяслысь кольӧм уроксӧ, Дарья Ивановналысь ньӧжмыд висьталӧмсӧ. И ӧні ярскӧба сяркӧдіс стӧча ставсӧ. Дарья Ивановна медводдзаысь Митрукӧс ошкис челядь водзын, со пӧ первоклассник, а тиянысь бурджыка тӧдӧ уроксӧ. Та бӧрын, кор Дарья Ивановна школаӧ вайліс выль книга, медводз сійӧс век лыддьыліс Митрук.

Митруклӧн батыс кымынкӧ лун гӧститіс сиктын, сӧсся бӧр веськӧдчис ӧтнасӧн чомйӧ, писӧ эз босьт, велӧдчӧмад пӧ нырасин да ог нин торк. Митрук челядь котыркӧд шар вылӧдз кольӧдіс батысӧ. Недыр собис пушыд лым пиӧд ӧтка дадюла да вошис еджыд ру пытшкӧ, ӧтнӧгыльтчис ляпкыдик тӧвся енэжтасыскӧд. Челядь разӧдчисны гортъясаныс, а Митрук дыр на видзӧдіс лым вылӧ гижтӧм векныдик туй вылас. Митруклы вӧлі гажтӧм, кок увті гартчысь турӧб шыльӧдіс батыслысь мунан туйсӧ.



## ЮРИНДАЛЫСЬ

<b>I. Тундра — Митруклөн горт . . . . .</b>	<b>3</b>
Митруклы гажтөм . . . . .	3
Сюрис шань ёрт . . . . .	5
Эн узь, чери кыйысь . . . . .	8
Мёдысь ог повзы . . . . .	9
Тундраса кутш . . . . .	10
Оз на төд . . . . .	14
<b>II. Митрук петö тундраысь . . . . .</b>	<b>16</b>
Бара туйö . . . . .	16
Кытысь лоöма төлысьыс . . . . .	19
Митрук мыжмö . . . . .	34
Митрук шедіс лэчкö . . . . .	41
Мыйла куричöны пастукьяс . . . . .	51
Митруклы отсалöны книгаяс . . . . .	57

**Егор Васильевич Рочев**  
**МИТРУК ВЫХОДИТ ИЗ ТУНДРЫ**

*Повесть*

*На коми языке*

**Для младшего школьного возраста**

**Художник В. И. Осипов**

**Редактор А. В. Некрасов**  
**Художественный редактор В. Б. Осипов.**  
**Технический редактор А. Н. Вишнева**  
**Корректоры: Т. А. Гудырева, М. М. Дейнега.**

**ИБ 1119**

Сдано в набор 08.01.87. Подписано в печать 26.09.87. Формат 70×90<sup>1</sup>/<sub>16</sub>.  
Бумага № 1. Гарнитура «Новая журнальная». Печать офсетная. Усл. печ. л. 4,97;  
усл. кр.-отт. 10,53; уч.-изд. л. 3,17. Тираж 5000. Заказ № 2745. Цена 15 коп.  
Коми книжное издательство. 167610, г. Сыктывкар, ул. Карла Маркса, д. 229.

Республиканская типография Государственного комитета Коми АССР по  
делам издательств, полиграфии и книжной торговли. 167610, г. Сыктывкар,  
ул. Первомайская, д. 70.